

BIBLIOTHECA  
SCRIPTORUM MEDII RECENTISQUE AEVORUM

I. FÖGEL ET B. IVÁNYI MODERANTIBUS  
REDIGIT L. JUHÁSZ, SZEGED (HUNGARIA)

SAECULUM XV.

AMERIGUS CORSINUS  
  
COMPENDIUM  
IN VITAM COSMI MEDICIS  
AD LAURENTIUM MEDICEM

EDIDIT

LADISLAUS JUHÁSZ

MCMXXXIV. — LIPSIAE — B. G. TEUBNER

BIBLIOTHECA  
SCRIPTORUM MEDII RECENTISQUE AEVORUM

I. FÓGEL ET B. IVANYI MODERANTIBUS  
REDIGIT L. JUHÁSZ, SZEGED (HUNGARIA)

SAECULUM XV.

AMERIGUS CORSINUS

COMPENDIUM  
IN VITAM COSMI MEDICIS  
AD LAURENTIUM MEDICEM

EDIDIT

LADISLAUS JUHÁSZ

MCMXXXIV — LIPSIAE — B. G. TEUBNER

Iq. kot

114 952



## INTRODUCTIO.

### *De vita et operibus Amerigi Corsini.<sup>1</sup>*

Amerigus Corsinus (Amerigo Corsini) patre Bartholomaeo die 12. mensis Augusti a. 1452. natus est. Sodalis Academiae Platonicae erat. Florentiae varios magistratus gessit: a. 1465. et 1500. prior, a. 1499. commissarius electus est, ut controversias Pistoriensium sedaret. A. 1501. unus e decem libertati conservandae (uno dei dieci di Libertà) creatur, quo anno mortuus est.

Amerigus Corsinus Marsilio Ficino amicissimus erat;<sup>2</sup> Bartholomaeus Fontius a. 1496. collectas epistolas ei dedicavit.<sup>3</sup>

*Opera*: Compendium in vitam Cosmi Medicis ad Laurentium Medicem. — De nativitate Nabuchodonosoris. — Elegiae.<sup>4</sup>

### *De Compendii codice.*

Quod carmen epicum solus codex servavit.

Florentia. Bibliotheca Medicea Laurentiana, cod. 145. della Leopoldina-Strozziana — Saec. XV. — Membran. — Codex 37 folia continet. Dedicatio: 1r; Compendium 2r — 37 v.

## ANNOTATIONES CRITICAE.

*Tit.* — Amerigus—Medicem] Compendium Amerigi Corsini in vitam Cosmi patriae patris ad Laurentium Medicem virum magnanimum.

*Ded.* Dedicatio] *om.*

*Liber I.* — Liber I.] *om.* — 3. Phaebea — secula — 7. ceptis — 12. nanque — 16. fulxerunt, fulxerunt — 25. Fulxit — 32. finitime — 39. Olympi — 41. immense — 44. Queque ferum — 47. mee — 52. Cilleni — 58. present — 69. Longevumque — 77. care — 79. sepe — 86. adequat — 88. substinet — 91. Nanque *corr. ex* Namque — 118. aequestrem — 132. fedebat

<sup>1</sup> Cf. *Passerini*, Luigi, Genealogia e storia della famiglia Corsini. Firenze, 1858., pag. 128—29. — *Lazzari*, Alfonso, Ugolino e Michele Verino. Torino, 1897., pag. 46.

<sup>2</sup> Epistolas *Ficini* ad eum scriptas v. *Opera* (Basileae, 1561.), pag. 672—73.; 860.; 873.

<sup>3</sup> *Fontius*, Bartholomaeus, Epistolarum libri III., ed. L. Juhász. Saec. XV—XVI. 1931.

<sup>4</sup> Elegiae ad nostram aetatem non pervenerunt, in quibus teste Ugolino *Verino* (Flametta, lib. II.) *Lisam* cantavit. — De carminibus eius amatoris cf. elegiam Naldi de Naldis (*Naldis Florentinus*, Naldus de, *Elegiarum libri III.* ad Laurentium Medicem, ed. L. Juhász. Bibliotheca Scriptorum Medii Recentisque Aevorum, Saec. XV—XVI. Lipsia, 1934. — Lib. I. eleg. 8.).

— 145. sepe — 150. intempeste — pugne — 152. cominus — 160. penas — 167. menibus — 177. arrida — 178. eslusque — 189. Heridanus — 196. Ocia — faedera iungins — 197. ocia — 200. equis — 205. herebo — 206. Sisipheo — 207. ceptique — 209. cede — 210. nanque — sevi — 214. resummere — 218. summunt — 223. Letantur — 226. noxeque — 227. penas — 228. estu — 233. herens — 249. boarde — 251. Maenibus — 253. Prepositi — prestantes — 259. hymbribus — 265. maenia — 266. sepe — 284. Emula — 285. trophais — 286. *heptameter* — 305. ledant — 309. leta — 315. Prestilit — 319. Medice — 324. parcla — 327. Ocia — 335. que — 349. cause — 352. comisse — 354. ammisce — 357. Praelia — 360. innupteque puelle — 378. prelia — 379. Nanque — 383. faedere — 405. Erario — 410. ceptis — 413. quecunque — 421. Phebi — 433. ceptis — 439. cecaque — 440. faederis — 456. egregiae — 458. faedere — 462. federa — 464. Sforze — 474. Foenoris — 476. celum — 478. ceca — 484. sue

*Liber II.* — Liber II.] Incipit liber secundus (*sic*) — 14. referctum — 18. orbem *corr. ex urbem* — 20. prestanti — 34. persepe — 35. vetuste — 36. false — 37. celi — 38. Ethereasque — 51. celi — 59. leta — 60. letum — 61. faelici — 89. tetro — 92. seva — 94. ambe — 96. prenoscens — 101. contute — 105. sevas — 112. nanque — 116. tetrum — 118. Ethruscam — teterrima — 121. thedes — 127. cure — 131. obprobriis — 136. praecibus — 141. ceco — 146. Obprobria — 154. Premia — 155. iccirco — 156. Olympi — 180. penis — 195. secula — 202. equa — 207. letabitur — 214. sydera — 217. letis — 224. Paena — 238. proprie — 239. caeptis — 240. Conclio *corr. e Concto* — 241. iniiecit — 245. penas — 246. seva — 248. Nanque — 250. vidue — 253. verse — 259. mestam — 265. Ocia — 267. Paena — 274. Querere — 285. perpetuumque — 288. Paena — letis — 290. letusque — 295. Ammisce — dure — 308. edes — 311. mestos — 322. mestrum — 328. praecibus — 331. Ethernamque — 332. letus — 334. olimpo — 336. Leta — 337. Letari — 354. prestans — 355. letus — 361. Hae — 371. letare — 374. edes — 391. presens — 393. sepe — 396. letusque — 403. Nanque — porte — 406. Quamprimum — ceca — 423. Nanque — 424. tue — 427. ceptis — 444. Quenque — 448. leti — 450. isthec — 464. presentia — 472. Nanque — 474. edes — 475. leti — 476. prestantis — 482. Nanque — 483. pulchre — 491. letus — 514. Querere — 515. Forenti — 519. Quenque — 523. edes — 524. aegregie — sacre — 527. evum — 528. secula

*Liber III.* — Liber III.] Incipit liber tertius — 4. Mesta — 9. plantu — 10. Femmineo — 12. ammisum — 13. meror — 20. gelide — 22. Nanque — 42. fouerant — 43. ammotis — 45. ethrusca — 48. ethrusca — 53. Premia — 79. Dannaque — 85. Ethruscam *corr. in Ethruscam* — 98. preparat — 100. celestibus — 105. prestare — 112. ethruscas — 119. Conctio — 125. edes — 136. prestare — 144. — Sepe — 150. letus — 162. Letus — 164. Letitia — 166. sepe — 169. letatur — 170. vidue — 172. Equora — obscure — 181. penis — 214. plumbini *corr. ex plumbini* — maenia — 219. prestare — 224. prelia — 239. federe — 241. maenia — 245. federe. — 251. Federa — 252. Eximat — 257. Maenibus — 262. resummat — 269. Extuat — 280. seva — 282. federe — 286. fedus — 294. Preterea — 296. dictionis — 316. faedera — 323. cecaque — 328. heret — 340. equora — 342. letis — 347. *inscr. s. m.* — 349. federa — 361. faedera — 371. Predatis — 374. ethruria — 379. Faedere — 381. et tum] tum — 387. placide — 396. Ethruscas — 398. celum — 399. faedere — 404. ocia — 413. presagia prestant — 425. inficior — 427. nanque — 430. negocia — 431. previsa — 433. pronostica — 436. prestans — 444. misaere — 450. aethernam — 452. enigmata — 457. sevos — 463. ha — 464. urbem *corr. ex orbem* — 473. summitque — *post* 476. τελωσ

## AMERIGUS CORSINUS

### COMPENDIUM IN VITAM COSMI MEDICIS AD LAURENTIUM MEDICEM.

#### DEDICATIO.

Mittit Amerigus tibi, Laurens inclite, versus,  
Qui pedibus trepidis atria magna petunt.  
Nec mirum, quoniam non doctus carmina vates  
Dictitat, immo rudis institor illa tulit.  
Sed tibi, quem referunt, commendet carmina Cosmus,  
Cosmus, Tyrrheni gloria magnâ soli.

#### LIBER I.

Candida lux mundi, vatum sanctissime custos,  
Qui genus humanum servas, qui luminis auctor  
Lampade Phoebea perlustras saecula cuncta,  
Te precor, indignus quamvis tua numina adire  
Nunc ausim et vatum pertingere sacra profanus  
Aggrediar, supplexque tuum nunc numen adoro,  
Pulcher Apollo, meis praesens nunc annue coeptis  
Et iubeas Cosmi describere facta parentis  
Magnanimique viri laudes attollere versu  
Castaliosque mihi sanctos infunde liquores.  
Da vires semperque velis fulcire labantem,  
Maxima namque humeris geritur nunc sarcina nostris.  
Sic igitur sacro aggrediar iam numine fretus  
Et tua describam nunc primum tempora, Cosme,  
Cosme, dabis nostris iam primum exordia chartis.  
Aurea fulserunt, fulserunt aurea certe  
Saecula, cum magnum vidit Florentia Cosmum  
Gestantem patriae curas et cuncta gerentem.  
Namque fides, spes certa simul sanctusque deorum  
Cultus et humanam servans concordia gentem  
Providaque in dubiis surgens sapientia rebus  
Et quae ferventes sensus contemperat omnes  
Quaequa resistit agens, nostram viguere per urbem.  
Exemplis accensa suis tunc maxima virtus  
Fulsit et ardentes ad sidera sustulit ortus.  
Hoc duce surgentes in te penitusque ruentes  
Bellorum fluctus horres, Florentia, nullos.  
Quin reges cessere tuis, cessere tyranni  
Viribus atque animos fracti posuere minaces

- <sup>30</sup> Bebriacique duces tumidi Venetumque senatus  
 In leges pacis veniunt et foedera firmant.  
 Hoc duce finitimae gentes populique propinqui  
 Attoniti iura accipiunt et iussa facessunt.  
 Nec magis horrescunt generosi bella leonis  
<sup>35</sup> Horrida, quam fidei mirantur numina sanctae  
 Florentis populi, summa et pietate moventur.  
 Sed libet hinc magnum primaque ab origine Cosmum  
 Dicere et in Medicas producere carmina laudes.  
 Iuppiter omnipotens clari de vertice Olympi  
<sup>40</sup> Prospiciens terras nostram deflexit ad urbem  
 Lumina et immensae tandem bonitatis amorem  
 Fundit et igniferis verbo sic imperat astris:  
 „Astra, meis aures, iubeo, ne claudite dictis,  
 Quaeque ferum terris aspectum, quaeque malignum  
<sup>45</sup> Traditis Etruscis, adversum quaerite caelum  
 Oppositique poli terris infundite lumen,  
 Vosque, meae laudes et dulcia pignora, nati,  
 Pulchra Venus, pulchro quae fulges sidere semper,  
 I, placidas accede domos et tecta benigna  
<sup>50</sup> Ingredere et, qua parte magis meliusve refulges,  
 Siste gradum et placidum terris infunde decorem.  
 Cylleni facunde, deum qui iussa per auras  
 Fersque refers, fido et constanti pectore servas,  
 Nunc tua, nunc opus est, concedat gratia nostro,  
<sup>55</sup> Qui mox sublimi demissus ab aethere alumnus  
 Humanas sedes et corporis antra subibit.  
 Prospera quin assint ardentis sidera Martis,  
 Caetera nunc praestent, quem possunt, astra favorem.  
 Tuque, tuis radiis totum qui circuis orbem,  
<sup>60</sup> Sol dilecte mihi, nunc ulnis excipe sacris  
 Nascentem Medica puerum de stirpe, Iohannes  
 Cui pater egregius meritis et munere gratus  
 Caelicolis, magnum magno quem nomine Cosmum  
 Appellent summoque habeant in honore minores.  
<sup>65</sup> Huic dabis Herculeos grandes superare labores  
 Illustremque virum factis acquirere famam  
 Egregiis tandemque sua requiescere in urbe  
 Divitiis clarum magnis opibusque potentem  
 Longaevumque senem placidam perducere vitam.“  
<sup>70</sup> Haec ait et dictis subito tunc omnia parent.  
 Nascentis pueri primos sol excipit ortus.  
 Appellat magnum fatali nomine Cosmum.  
 Ast illo insignes summa pietate parentes  
 Suscepto gaudent, iussis et numine divum  
<sup>75</sup> Tempa adeunt moniti atque ingentia munera donant.  
 Mox, simul ac vitam dulces incepit et auras  
 Carpere et in gremio carae perludere matris,

- Multa monent vigilem, sopitum plurima tangunt  
Signa patrem, saepe et suspensum somnia tentant.  
80 Cogitat hinc etiam tacitus secumque volutat  
Miraturque graves puerili in pectore curas  
Consiliumque senis teneris miratur in annis.  
Quin etiam totam vulgatur fama per urbem  
Hunc fore, qui, veluti mensuram nominis ampli  
85 Continet, ingenti sic et virtute peracta  
Compleat et gestis magnum sic nomen adaequat.  
Hinc omnis pendet cari iam cura parentis,  
Imbuat ut natum. Quamprimum sustinet aetas  
Cecropiis studiis et doctae munere linguae.  
90 Non natus, non ipsa patrem tum cura fefellit,  
Namque Fluentinos subito sic inter alumnos  
Doctior evadit longe et conspectior omni  
Iam virtute micat, reliquos ut continet omnes  
Pergere et aequales incenderit inclita virtus.  
95 Ad quem tum genitor placido sic pectore fatur:  
„Nate mihi solus, multis spes maxima signis,  
En aetas mi grandis adest, en pectora curis  
Abiectis placidam poscunt iam lassa quietem.  
Grandia nostra libens adeas nunc munera, oportet,  
100 Sive domi seu magna foris tractanda manebunt,  
Nec tenerum teneris annis te terreat aetas.  
Nam video, quales puerili in pectore curas  
Gesseris et quantum de te sperare valemus,  
Nec dixisse pudet coram. Laudata resurgit  
105 Virtus et vires laudando suscitatur omnes.  
Perge, precor; factis dictisque et mente iuvabo.“  
Filius haec contra:  
„Tuus, o pater optime, summus  
Cogit amor nati de me sperare, quod ipse  
Non valeam aut ausim, teneris et fidere in annis.  
110 Si tamen aspirent nostris pia numina coeptis,  
Non aetas, non ipse labor, non grandia terrent  
Munera: quis potero, te curis ipse levabo.“  
Ex illo iam cuncta domus cunctique labores  
Suscepti et summa semper cum laude peracti.  
115 Nobilis ac veluti iuvenis, cui pectora vires  
Pulsant et multo calidum cor sanguine fervet,  
Arte prius certa doctus monitisque magistri  
Ardens in campum ad pugnam descendit equestrem,  
Unde refert victor laudes et laurea dona:  
120 Munera non aliter privata et publica Cosmus  
Aggreditur magnum curarum missus in aequor,  
Rettulit unde pium nomen famamque perennem.  
Dicere nunc, quantum Medicum res creverit illo  
Tempore vel quanto res demum publica sumptu



- 126 Innixa imperium iam iam produxerit amplum  
Sub iuga finitimis populis atque urbibus actis,  
Difficile est, sed summa sequar fastigia rerum.  
Iam nigra perpetuo vexabant Tartara fletu  
Invisas Thuscis umbras manesque superbos  
130 Virtutis comitis, iam custos Cerberus Orci  
Dentibus infestis frendens et morsibus atris  
Pallida Bebriaci foedabat membra tyranni.  
Et merito, quoniam nullis, dum vita manebat,  
Legibus adstrictus regni, quocunque cupido  
135 Verterat, imperium tentat producere rupto  
Foedere et indicto furit hic persaepe duello.  
Ah, quotiens nostris infestus finibus arma  
Intulit et placidam pervertit Marte quietem  
Fraudibus aggressus patriae submittere nostrae  
140 Libera iura suis titulis regnoque potiri.  
Insurgunt contra cives, nec terruit ullus  
Bellorum strepitus, manet alto corde repostus  
Carus amor patriae, magnis et viribus obstat.  
Nec solum nostris hostem discedere terris  
145 Cladibus iniunctis et fractis saepe manipulis  
Cogunt, sed Thuscas horrescit Gallia turmas,  
Cogitur et propriam iam desperare salutem  
Agminibus cedens Thuscis et lilia cernens  
Rubra pererratis iam totis finibus acta.  
150 Quod si intempestae expertus discrimina pugnae  
Non foret, et propriis non esset viribus ausus  
Allexandrinis devincere comminus arces  
Armenicus princeps, nostris dum sumptibus Alpes  
Transiit Auguti monitus se iungere castris,  
155 Qui tum Brixenses populatus milite campos  
Fluminis ad ripam castris descenderat Abdae.  
Sed furor intrepidus pugnandi Gallicus ardet  
Certaue vincendi stimulat spes ipsa furentem.  
Non tempus pugnae, non multa pericula pendet,  
160 Sed dedit, heu, meritas ducis imprudentia poenas.  
Nam fracto caesoque simul tum milite captus  
Armenicus princeps accepto vulnere parvo  
Allexandrinam expirat perductus in urbem.  
Consiliis, inquam, Auguti si credere princeps  
165 Armenicus sciret velletque audire monentem,  
Tum demum potuit tanto succumbere bello  
Bebriacus solis confisus moenibus urbis,  
Nec Cisalpini vererentur signa coloni  
Serpentis viridis puerum nunc ore prementis.  
170 Forsitan et Thusci videas nunc rubra leonis  
Per Cisalpinos venerari lilia Gallos.  
Sed modo, qui victus victricia cernere signa

- Et timet et parum se tutum credit in urbe,  
 Illo quam primum tanto certamine victor  
 175 Insurgit, furit ac instat minabundus et ardet.  
 Non aliter, quam flamma diu suppressa resumtis  
 Viribus assurgit seseque per arida miscet  
 Nutrimenta furens aestusque ad sidera tollit;  
 Cuncta vorat fremitu magno longeque vagatur.  
 180 Hinc dux Bebriacus constructo milite totis  
 Viribus aggreditur Thuscas deperdere turmas,  
 Sed ducis Auguti tutas prudentia reddit  
 Incolumisque viam secat hostes inter et arma.  
 Nec quamvis magna percussus clade senatus  
 185 Defuit Etruscus, non ullis territus armis  
 Succubuit multoque magis tum nititur audens.  
 Neve Padi ripas dubitat coniungere ponte  
 Immensis trabibus tum magnis sumptibus acto,  
 Eridanus qua parte tuis, Placentia, campis  
 190 Defluit et rapidis nonnunquam volvitur undis.  
 Hinc per te primum pacis tum mentio facta,  
 Bebrice; at non pacis amor, non ipsa quietis  
 Dulcedo invitant, sed tanto Gallia bello  
 Fessa monet tantisque malis exterrita cedit  
 195 Mens tua fallaci sperans se vincere fraude,  
 Otia dum simulat nobiscum et foedera iungis.  
 At non plus uno durant haec otia lustrum;  
 Rumpendae pacis causas bellicque movendi  
 Commentus plures fines invadis et agros.  
 200 Sed pater omnipotens, oculis qui conspicit aequis  
 Cuncta pari ac recta librans mortalia lance,  
 Non impune sinit tantas committere fraudes.  
 Nam iubet actutum fatalia stamina Parcas  
 Frangere et exosam Galeacti claudere vitam,  
 205 Ablegat atque umbras Erebo noctique profundae  
 Sisyphoeo mandans torqueri pondere manes.  
 Ergo tot incassum sumpti coeptique labores  
 Tam subito pereunt, quin magnis cladibus urgent  
 Natos et turpi funestant caede penates.  
 210 Illico namque omnes, quos saevi dira tyranni  
 Ambitio extorres patria regnoque fugavit,  
 Conspirant magno iungentes agmine turmas.  
 Unusquisque suis tentat pro viribus audens,  
 Sperat et amissos raptosque resumere fascas  
 215 Et regni titulos ardens affectat avitos,  
 Armata et intrepidus multis accensa querelis  
 Tum vindicta viros acuitque in mente furorem  
 Teque ducem tantis sumunt, Florentia, rebus  
 Auspiciisque tuis hostiles milite campos  
 220 Irrumpunt agrosque simul populantur et urbes.

Vi partim partimque metu partimque benigna  
Fronte suos noscunt dominos illisque receptis  
Laetantur vulgo et sublato murmure plaudent.  
Sic igitur tanti et tam magni nominis heres  
225 Vix Mediolani princeps tunc imperat urbi  
Bacchaturque furens ira noxaeque paternae  
Dat poenas proprio diffundens sanguine vitam.  
Gallia dum tanto bellorum fluctuat aestu  
Transque Padum citraque simul, dum cladibus amnis  
230 Luctatur miseris, veteris Florentia belli  
Non oblita, suis quondam quod finibus infert  
Pisa Flumentinis semper contraria rebus  
Quodque mali nuper Galeacti partibus haerens  
Ingerit atque urbem quanto discrimine versat,  
235 Haud ignara videt, tantis edocta periclis  
Tempus adesse putat Pisas tum subdere posse.  
Posthabitis igitur reliquis Florentia curis  
Pisano solum totis tum viribus ardens  
Incumbit bello, magnis nec sumptibus ullis  
240 Parcitur atque una concurrunt mente vicissim  
Et populus summique patres totusque senatus.  
Quisquis ab incepto nunquam desistere bello  
Hortatur, donec Tyrrheni signa leonis  
Pisanis cernant sublimia turribus altis  
245 Iactari vento atque aura crepitante moveri.  
Conflaturque brevi pulchris exercitus armis  
Insignis multisque virorum milibus ingens.  
Omnia quaeque vident superandis urbibus apta,  
Instrumenta parant, ingenti mole boardae  
250 Curribus aptantur magno terrore ruinam  
Moenibus atque urbi summa cum clade ferentes.  
Albitiusque Masus Ginusque Caponius ipsis  
Praepositi castris praestantes nomine cives  
Artibus et belli insignes, qui cuncta gubernent  
255 Quique regant cunctis summa virtute verendi.  
Compositis igitur rebus, tum rite paratis  
Irrumpunt subito fines Pisisque sub ipsis  
Castra locant et campos omnes milite complent.  
Saepius ac veluti cum magnis imbribus Arnus  
260 Planitiem totam ripas egressus inundat,  
Cuncta trahit secum rapidus villasque domosque  
Subvertit Pisasque infestis percutit undis:  
Haud aliter furibunda ruit manus omnis et agros  
Diripiunt ferro, villas atque oppida vertunt.  
265 Nil obstat, donec Pisarum moenia cingant  
Milite et infestis quatiant saepe ictibus urbem.  
Utque mari ac terris aditus claudatur ubique  
Horribilisque premat clausos penuria cives,

- Cogat et invitos Tyrrheni iura leonis  
270 Accipere et nostris submittere legibus urbem,  
Ad mare supra Arnum vicinus ducitur urbi  
Pons sudibus firmatus aquis trabibusque refixus;  
Quove foret tutus, ripa munitur utraque  
Castellis valido defensis milite semper.  
275 Hincque fames et dura viris affertur egestas  
Obsessis, hinc immundis animalibus audent  
Consumptis herbis miseram deducere vitam  
Quaeque extrema pati obdurata mente parati.  
Dura sed ipsa fames ac imperiosa coegit  
280 Cedere, quodque necesse foret tum flectere mentem,  
Ostendit, populi cum passim languida cernant  
Corpora per vicos et compita strata iacere  
Et moribunda deos omnes hominesque precari.  
Aemula tum demum Tyrrheni Pisa leonis  
285 Urbsque potens et multis quondam ornata tropaeis  
Imperio devicta tuo cessit, Florentia, magnum  
Incrementum addens titulis urbique decorem,  
Quae docuit, quantum fortunae fidere quisquam  
Debeat et quantum humanae fiducia sortis  
290 Vana sit instabili pervertens omnia motu.  
Nam modo, qui soliti fuerant dare iura rogati  
Et dictare suis populis legesque iubere,  
Mox patriam dulcesque domos sanctosque penates  
Linquere et invisis dominis parere coacti.  
295 Quique suum servare decus patriamque tueri  
Vix sperant humilique deos paulo ante precantur  
Voce diuturno se posse resistere bello,  
Hostibus imperium mox produxere subactis  
Victoresque suis opibus vicere potentem  
300 Armis et longo regnantem tempore Pisam.  
Sicque suas fortuna vices variata gubernat  
Instabilisque manens adversis prospera semper  
Miscet nonnunquam praeponens infima summis.  
Sic visum superis, nimium ne laeta superbos  
305 Extollant, miseros nimium ne tristia laedant.  
Ergo Fluentini tam magno munere laeti  
Sacra deum per templa colunt totamque per urbem  
Solemnes ducunt pompas sacrisque peractis  
Annua vota iubent persolvi laeta quotannis.  
310 Et licet in tenera Medices aetate maneret  
Et tribus exactis impleset tempora lustris,  
Non tamen in cunctis patriae tum defuit heros  
Consiliisque puer patriam — mirabile dictu —  
Iuvat et immensis opibus subvenit egenti.  
315 Praestitit haec eadem, cum Ladislaus ad urbem  
Infestis descendit equis peditumque phalanges

Duxit in exitium campis villisque ruinam.  
Sed Florentini celebris tunc fama per urbem  
Nominis atque domus Medicae tum gloria praestans  
320 Perterrent regem coguntque remittere bellum  
Et pacis firmum nobiscum iungere foedus.  
Tum primum Cortona, iugis quae prominet altis,  
In nostras didicit iurare et vivere leges.  
Denique parta quies, quae plures durat in annos  
325 Et multum nostris conducit civibus urbem  
Quam magnis ditata bonis monstratque cavendum,  
Otia ne quis amet sanctae dirumpere pacis.  
Quid referam, quanto videas tunc surgere sumptu  
Publica vel quali splendescere tecta nitore  
330 Privatim cernas? Sanctorum templa deorum,  
Quidve loquar, quanto videas constructa decore?  
Nec referam, quae, Cosme, tuis tum sumptibus ornas  
Quaevae locas fabricanda novis suffulta columnis,  
Neu dicam, quantos tulerint portoria fructus,  
335 Mercibus adductis Medices quae plurima Cosmus  
Implet ab extremo sole occidente petitis.  
Sed ducis Insubrium fallaci mente Philippi  
Ambitio Italiam subito perducit ad arma.  
Et quamvis, Martine, geras pia sacra sacerdos  
340 Atque vicem Christi subeas, qui pace relicta  
Discipulis mandat servare per omnia pacem,  
Bella foves tamen et bellorum semina nutris,  
Quae terris exulta tuis crevere per omnem  
Italiam, ut fructus dederint collecta feraces.  
345 Qui tamen, ut cuncti rentur, gustantur acerbi  
Nunc tibi, cum Christi produceris ante tribunal,  
Ante tribunal, ubi nullum discrimen habetur,  
Personam quam quisque gerat, nil mitra nec ipsi  
Imperii fasces causae prodesse valebunt,  
350 Sed magis urgebunt conversi in pondera honores  
Atque prement humeros magna sub mole iacentes.  
Reddere cogere commissae computa gentis,  
Pascere quae vobis et custodire magister  
Mandat et a vobis amissae damna reposcet.  
355 Dicere namque pudet, quot tunc periisse sub armis  
Constat et ardentis subiisse pericula belli.  
Proelia quanta suis misceri Gallia campis  
Transque Padum et citra vidit, quot bella per ipsos  
Etruriae saltus quanta cum clade geruntur,  
360 Oppida vertuntur, pueri innuptaeque puellae  
(Indignum facinus) coram spectante parente  
Indomitam rabiem victoris militis explent?  
Quid memorem, quantas perpessa est Brixia clades,  
Dum Venetum ac nostris fuerit circumdata castris

- 365 Et demum vi capta suis spoliataque rebus  
Viderit ingentes cumulari mortis acervos?  
Quid referam, quales bellorum incendia vires  
Extulerint Italas omnes flagrantia terras?  
Quae postquam, Martine, tuis errantia tectis  
370 Videris intentus curas lenire, sed illa  
Acrius insurgunt nimiumque incensa vagantur  
Et rapidis pariter comburunt omnia flammis.  
Attamen, instando penitus ne cuncta vorentur,  
Tum demum; resoluta suis dum viribus errant  
375 Atque deest pabulum, bellorum incendia cessant.  
Sic tandem cessata quies firmataque parvo  
Tempore perdurat, nimium dum bella parati  
Exercere viri mentes ad proelia vertunt.  
Namque Flumentini prudentia tanta senatus  
380 Tum viguit Medicum monitis excita parentum  
Consiliisque exulta piis, dum cuncta requirunt,  
Quae possint nostris melius conducere rebus,  
Ut Venetis sancto coniunctis foedere bellum,  
Quod propriis fuerat gestandum viribus, ipse  
385 Susciperet Venetus paribusque resisteret armis.  
Sic hostes fracti, sic omnis concidit ardor  
Pontificis, sic ipsa suum Florentia nomen  
Servat, sic titulos Veneti auxere potentis  
Imperii multis devictis urbibus, unde  
390 Et decus et magnus provenit fructibus usus.  
Hinc Florentinus, flatu dum cuncta secundo  
Succedunt vultuque favet fortuna sereno;  
Ardens imperii latos extendere fines  
Ulciscique graves magno discrimine clades  
395 Saepius iniunctas causasque auferre nocendi  
Aggreditur bello vicinam subdere Lucam,  
Primates quanquam gravibus convincere dictis  
Conentur Medicesque feros mollire precando  
Pergat et adductis doceat rationibus omnes:  
400 „Bella mali quantum tulerint, ni iusta gerantur  
Aut provisa satis; variis quam casibus instet  
Mars dubius versetque vices fortuna priores.  
Praeterea, quantum bellis defessa quietem  
Publica res poscat quantumque pecunia desit  
405 Aerario, magnis quod sit iam sumptibus haustum.  
Ac odia advertant infidi saeva Philippi,  
Qui belli causas nactus tempusque nocendi  
In longum possit tantum producere bellum.  
Quin etiam Venetos dubia iam mente timendos,  
410 Ne forte invideant coeptis felicibus atque  
Omnia pervertant taciti viresque ministrent  
Hostibus et placidum simulata pace loquantur.

- Dii, precor, avertant, quaecunque incommoda nostrae  
 iam video patriae instare et — sim falsus haruspex —  
 415 Attamen in cunctis noscat me quisque paratum  
 Pro patria cunctosque graves perferre labores,  
 Quaeque mihi cara pro libertate manebunt  
 Gestanda, illa libens ac laetus semper obibo.  
 At, quibus arbitrium legum, quis summa potestas,  
 420 Decernant patriae pulchrum sive utile nostrae.  
 Haec Cosmus tanquam divini oracula Phoebi  
 Dictitat. Haec surdis descendunt auribus. Ingens  
 Exitium patriae, bellum decernitur. Ardent  
 iam iam Lucenses vallo circumdare muros.  
 425 Piccininus adest contra dux inclitus armis  
 Incautosque premens nostros funditque fugatque.  
 Sic res ipsa fidem primo certamine fecit  
 Verbis, quae tenues fuerant dilapsa per auras,  
 Et docuit, quantum humanis prudentia rebus  
 430 Conducit quantumque obsit non credere doctis  
 Consiliis nimiumque suae confidere menti.  
 Publica cura vetat, servandi sanctus honoris  
 Ardor agit cives nunquam desistere coeptis.  
 Instaurant acies peragendoque acrius instant  
 435 Bello ornantque novas conducto milite turmas.  
 Nunc ducis Insubrium calido defenditur astu  
 Luca per instructos simulata pace maniplos,  
 Nunc Venetum invidia, cupiunt dum cuncta subesse  
 Regna sibi Italiae caecaque cupidine ducti  
 440 Iura valere sinunt sanciti foederis atque  
 Francisco promissa minus stipendia solvunt;  
 Hoc solum ne Luca iugum devicta subiret;  
 Obliti nostris opibus superasse potentes  
 Urbes ac populos iussis parere coactos;  
 445 Brixia, Tervisium et vicinum montibus altis  
 Bergamum et obscuro nec nomine plurima capta  
 Oppida Bebrico quondam subiecta Philippo.  
 Sic ingens nostrae profusis sumptibus urbi  
 Dedecus exoritur, spes irrita procidit omnis.  
 450 Libera conservat solitum sic Luca tenorem.  
 Ulla nec possunt procres in parte iuvare  
 Consiliis, non ipse valet prodesse roganti  
 Auxilium patriae Cosmus, qui fungitur omni  
 Officio civis Venetumque orator ad urbem  
 455 Pro patria missus sancto de foedere multa  
 Disputat egregie longoque ex ordine narrat,  
 Quid Florentinus socialia iura secutus  
 Gesserit et quales servando foedere sumptus  
 Fuderit et quantum Veneti reverenda senatus  
 460 Creverit auctoritas et qualia bella secundis

- Auspiciis gesta et quales quantaque receptae  
 Urbes ; nunc tantum servari foedera posci  
 Stareque promissis, ut sancti formula iuris  
 Postulat et Sforzae pactos persolvere nummos.  
 465 Attamen incassum dulci prolata sapore  
 Verba cadunt, responsa satis nec certa reportat.  
 Sed, quibus apparet simulatis texere fraudem  
 Velle dolis cupidasque in regnum tendere curas,  
 His arrecti animi stupefactaque corda virorum  
 470 Advertunt patriae mentem tunc protinus omnes  
 Atque opus esse vident placidae indulgere quieti  
 Obmissis bellis et demum parcere tantis  
 Impensis, ne forte ruat magna obruta mole  
 Fenoris instanti succumbens lassa periclo.  
 475 Certatim Medicem miris extollere quisquam  
 Laudibus in caelum curasque referre salubres  
 In patriam mentemque viri laudare fidemque.  
 Et, ni caeca feros bellandi insania cives  
 Egisset mentemque piis advertere dictis  
 480 Ac monitis Cosmi scirent, res publica tantis  
 Haud submersa malis solitum servaret honorem,  
 Non auri ingratis tantos fudisset acervos.  
 Haec referunt cives passim totamque per urbem  
 Vulgantur cunctique suae conferre saluti  
 485 Rentur, ut incertae Medices succurreret urbi  
 Consiliis patriaeque suum cumlaret amorem.

## LIBER II.

- Sic Cosmi celebris volitat tunc fama per urbem,  
 Sic omnis pariter privata et publica ad unum  
 Conferri Medicem gaudent ; fit magnus ubique  
 Consensus patriae, sed enim prudentia Cosmi  
 5 Cernitur inque dies maior maiorque redundat  
 Fama viri ; res ipsa docet cunctique fatentur  
 Mortali quoddam versari in pectore maius  
 Et magis egregium, divino numine mentem  
 Afflari, nam vera procul sic cernere posse  
 10 Non hominem humana constructum labe, nec ipsum  
 Sufficere ingenium mortali mole gravatum.  
 Nec solum hac una cernas virtute decorum,  
 Quin aliis fulgere bonis virtutibus atque  
 Moribus egregiis ac omni laude refertum,  
 15 Insuper ornatum videas, quibus ipsa beatos  
 Plebs indocta viros narrat. Quis ditior unquam  
 Aut magis excellens opibus conspectus in urbe  
 Tyrrhena et clara notus iam voce per orbem ?  
 Huic rerum natura suum largitur honorem.



- 20 Progeniem sed enim praestanti nomine claram,  
 Quae sit nulla in parte minor, talesque nepotes  
 Proferat in lucem, ut magnis maiora frequenter  
 Addant et summo nascentes culmine rerum  
 Altius extollant longeque decentius ornent.
- 25 His dum Tyrrhena felix versatur in urbe  
 Vocibus insignis Medices, dum publica tractat,  
 Omnibus acceptus cives dum diligit omnes,  
 Forte per Etruscas gressus direxerat urbes  
 Et Florentini conscenderat alta palati
- 30 Culmina prospectura domos et facta virorum  
 Magnipotens Fortuna, deus quam procreat olim,  
 Cum primum terras caelumque et sidera fecit  
 Humanumque genus, quam sacro nomine divam  
 Sivit honorari et votis persaepe vocari.
- 35 Quin et templa dedit, quae olim coluere vetustae  
 Gentes et falsae sectantes dogmata legis;  
 Sed vetat excelsi transcendere limina caeli  
 Aethereasque habitare domos, nec nomen habere  
 Passus neve locum excelsa inter tecta deorum.
- 40 Humanas tantum concessa potentia sortes  
 Arbitrio versare suo, sic infima summis  
 Miscere et loto penitus dominarier orbi.  
 Omnia subiecit sorti; Sapientia solum  
 Libera Fortunae contemnit iura potentis.
- 45 Illa igitur tales captans de culmine voces  
 Et celebrem Medicis famam tumque omnia cernens  
 Prospera felici iam iam succedere Cosmo  
 Haec secum volvens multa tum ferbuit ira :  
 „Illene Cosmus erit solus, qui numina temnat
- 50 Nostra impune diu? Nil en mea iura valebunt?  
 Quid mihi divinum nomen, si limina caeli  
 Scandere neve licet penitusque excludor ab alto,  
 Nec valeo humanis quicquam proscribere rebus  
 Et concessa mihi iam iamque potentia cessat?
- 55 Nonne foret melius nigras habitare tenebras  
 Seu furiale malum seu quicquid Tartara dirum  
 Horrent, quam vano iactari nomine divae,  
 Nec posse unius mortalis tangere nomen?  
 Arrisi quotiens oculis, heu, laeta serenis
- 60 Ingrato Medici? Quotiens mea munera laetum  
 Effecere virum et felici sorte beatum?  
 Num supplex unquam nostris pia contulit aris  
 Munera? Num verbis tantum veneratur honestis  
 Numina nostra semel nomenque in sacra vocavit?
- 65 Gratia num nobis meritis pro talibus ulla  
 Unquam habita est animi demonstrans signa benigni?  
 Quin verbis delusa feris et mente superba

- Quaeque indigna nimis patior. Tum iurgia solum  
 Pro donis sacrisque et grata mente reporto.
- 70 Scilicet ardentis virtutis nomine fretus  
 Atque tuum iactans sanctum, Sapientia, nomen  
 Immunem nostro sperat se numine factum.  
 Libera sit quamvis nostris Sapientia fatis,  
 Attamen experiar, valeant quid numina nostra.
- 75 Et, mihi si desint vires, descendere ad ipsa  
 Tartara nec dubitem furiasque excire feroces.  
 Talibus esto armis tutus spernatque superbus  
 Tum Medices talesque iratos sentiat hostes.“
- Haec secum repetens subito descendit ad umbras
- 80 Tartareas nigrasque petit sine lumine sedes  
 Haud iter ignotum peragens, nam saepius unam  
 Excitat aut aliam horrenda de sede sororum.  
 Tum sic alloquitur Phthonem supplexque precatur :  
 „Phthone cara mihi et multum dilecta, quod unquam
- 85 Haud frustrata tuas vires numenque petivi.  
 Sed, tua si quando fuerit mihi prompta voluntas,  
 Nunc precor, expedias celeri mea vota tumultu  
 Et Florentinam subvertas ocus urbem  
 Pectoraque inflammes livore ardentia taelro
- 90 Cordaque pestifero irrites madefacta veneno  
 In Medicamque domum in Medicemque furentia Cosmum.  
 Quod nunc saeva premant odiis succensa virorum  
 Pectora nunc Medicem, nil, heu, iam nostra valebunt  
 Iura, sed incassum iam iam conabimur ambae.
- 95 Nam, qui fortunae flexus variosque reflexus  
 Evitare potest praenoscent cuncta malorum  
 Semina et adversis rebus valet usque mederi,  
 Hic facile invidiam superat, tum conterit omnem  
 Livorem et prudens ferventia pectora mulcet.
- 100 Ergo age terribilisque manens da cuncta reple  
 Invidia atque odiis fecundum concute pectus,  
 Obrutus ut Medices odiis et fluctibus atris  
 Invidiae pressusque gravi tum pondere ad ima  
 Concidat et demens Fortunae temnere discat
- 105 Numina, tum saevas abiectus mulceat iras  
 Invidiae virtusque suum, si possit, alumnum  
 Protegat et miserum verbis soletur amicis.“
- Rettulit haec contra Phthone
- „Quid nostra precaris  
 Numina ? Quid tantum verbis facunda benignis
- 110 Hortando suadere paras ? En protinus adsum  
 Prompta tibi semper. Iubeas modo, diva, paratam  
 Invenies Phthonem ; nobis namque omnia per te  
 Iura vigent solumque tuis pugnamus in armis.“
- Dixit et extemplo horrendis armata colubris

- 115 Sulphureasque faces quassans et pallida circum  
 Ora ciens taetrum late perfudit odorem.  
 Exin celsa petens gressus direxit ad urbem  
 Etruscam procerumque domos taeterrima serpit  
 Pestis et immundo quam primum cuncta veneno  
 120 Inficit et toti paulatim illabitur urbi.  
 Inque dies crescens incensas sulphure <sup>taedas</sup>  
 Perque domos passim perque atria magna virorum  
 Coniicit et demum miseranda incendia miscet  
 Incensaque furens tota bacchatur in urbe.  
 125 Inde petit victrix excelsa palatia circum  
 Mille dolos fundens et mille induta figuras  
 Incenditque viros, quorum tunc publica curae  
 Iura magistratus; neque enim labor arduus instat,  
 Nam facile incensas dictis exaggerat iras.  
 130 Hinc Cosmi laudes subito vertuntur in ipsa  
 Iurgia et opprobriis vulgo laceratur acerbis.  
 Hinc suspecta viri virtus, suspectus et ipse  
 Tunc Medices odiisque miser damnatus iniquis.  
 Nec, quamvis magna cernat se mole gravatum  
 135 Invidiae videatque odiis ardescere mentes,  
 Seu precibus tentat blandis mulcere furentes,  
 Frangere sive feros conatus viribus audet.  
 Integer est animus solum; tum conscia recti  
 Mens hominem sperare iubent et fidere divis.  
 140 Ergo vocatus adest subito dominosque potentes  
 Solus adit, caeco statim sed carcere pressus.  
 Hos inter motus, tanta et discrimina vitae  
 Dum Medices versatur inops, dum sancta precatur  
 Numina, Relligio ac Pietas sensere precantem  
 145 Tum Medicem miserumque vident indigna subire  
 Opprobria et subito carum miserantur alumnum.  
 Et prius haec secum humana de gente queruntur:  
 „An potis humanas tanta caligine mentes  
 Obvolvi, ut nulla iam iam ratione regantur?  
 150 Quid virtus probitasve suum num servat honorem?  
 Praemia quae iustis? Nunquid condigna geruntur?  
 Heu languent miseri. Solus laudatur iniquus,  
 Perfidus, immundus latro; tum magna reportat  
 Praemia et in summo semper versatur honore.  
 155 Non tamen idcirco desperat iustus et unquam  
 Desinat esse pius, nam summi rector Olympi  
 Nil temere incertave gerit ratione, sed aequus  
 Omnibus aequa dabit, non impunita relinquet  
 Flagitia et iustis tum praemia certa relinquet.  
 160 Qualia nunc noster Medices discrimina vitae  
 Captus ob invidiam subit? Ecquis iustior alter  
 Aut magis excellens?“

- Sed stat sententia castas  
Fundere ad alta preces summi praetoria regis  
Pro Cosmi patriaeque simul nostraque salute:
- 165 „O pater omnipotens, qui complex omnia solus  
Complendoque simul divina mente gubernas.  
Cuncta prius, quam facta forent essentque futura,  
Ipse vides semper primaque ab origine visa  
Perpetua ratione geris tumque ordine miro
- 170 Dispensas parentque tuo sic omnia verbo.  
Nunc miserere pii Medicis, miserere parentis  
Nunc patriae et nostri demum miserere, precamur.  
Quisnam Tyrrhenis unquam fuit alter in oris,  
Per quem nostra magis colerentur numina vel qui
- 175 Tum pietate gravis tum religione severus  
Conferretque magis patriae vel templa deorum  
Pulchrius ornaret vel munera plura referret.  
Cernis enim, quanta immeritus nunc mole prematur  
Invidiae et, tua quam primum ni summa potestas
- 180 Succurrat misero, quibus, heu, luet ultima poenis.  
E tantis igitur Medicem nunc eripe flammis  
Et curam nobis natum patriaeque parentem  
Restitue et votis aures nunc porrige nostris.“
- Tum pater omnipotens oculis et mente serena
- 185 Suspicit orantes, placido et sic incipit ore :  
„Cara mihi Pietas, dulcis super omnia semper  
Religio, vestrum merito laudamus amorem,  
Nec fudisse preces casta nunc voce pigebit.  
Ex animis omnem, iubeo, deponite curam.
- 190 Haud incerta salus vestro iam surgit alumno,  
Nec solum poterit tantos evadere fluctus  
Incolumis, nam plura mihi nunc pandere vobis  
Fatorum secreta libet, quae figite vestris  
Auribus et tacita servate haec gaudia mente.
- 195 Sed refert notum et clarum per saecula nomen  
Tutus ab invidia et longe securus ab omni  
Fortunae casu, quamvis nunc utraque contra  
Nitat virisque in eum nunc excitet omnes.  
Altera victa cadet, bene vertens altera semper
- 200 Gaudebit mutasse vices, gaudebit et ipsum  
Tollere in astra virum facietque in cuncta beatum.  
Exilium modo, quod nunc fati imminet, aequa  
Mente tulisse queat, quanto vertetur honore  
In laudemque viri, tum famam nominis amplam.
- 205 Nam patria exactis nonnullis mensibus orba  
Et tantis privata bonis revocare parentem  
Gestiet et reduci laetabitur usque recepto.  
Illo tum demum felicem tempore Cosmum  
Dicere namque licet, tum vos vidisse iuvabit

- 210 Publica gestantem vel numina nostra colentem.  
 Gaudia magna patri sumpta de prole futura  
 Conspicio; nam quaeque senis tum prompta subibit  
 Munera tumque sibi geminos dabit illa nepotes,  
 Qui Medicum clarum tollant ad sidera nomen.
- 215 O quantum nobis merito gaudere licebit  
 Talibus ex natis et tali munere divum.  
 Ergo agite et laetis animis his plaudite dictis.“  
 Interea magnus Tyrrenam incesserat urbem  
 Motus et ingenti nutabant cuncta tumultu.
- 220 Hos agitat Livor cives, hos dira Cupido  
 Regnandi stimulat, nonnullos improbus auri  
 Cogit Amor verbis Medicem incusare dolosis.  
 Nec satis ulla potest illis condigna videri  
 Poena viris: odiis adeo exarsere nefandis.
- 225 Quin alii totam strictis mucronibus urbem  
 Percurrunt mortemque reo tum saeva minantur  
 Vulnera et horribili consternunt cuncta tremore.  
 Publicus hinc agitur subito conventus et omnis  
 Area completur, quae magna palatia circum
- 230 Strata iacet populusque furens ruit undique totus,  
 Attonitique patres adsunt, qui iussa vocati  
 Expediunt tristes certamque instare ruinam  
 Tum patriae cernunt, ullis nec posse mederi  
 Consiliis sperant, circumstrepere horrida solum
- 235 Arma vident timidosque animos desuetaque corda  
 Ipse pavor pulsatur, rumpunt suspiria vocem  
 Inceptam casumque dolent insontis amici,  
 Nec prodesse valent, propriae nam cura salutis  
 Quosque tacere docet nullisque resistere coeptis,
- 240 Concio tum demum populo celebrata frequenti  
 Omnibus iniecit pavidum per corda timorem,  
 Hinc octo concessa viris tunc summa potestas,  
 Qui rerum curam gererent promptique subirent  
 Iussa magistratus summi scelerumque ministri
- 245 Mandarentque reis poenas et vincula captis.  
 Bis tentata pii Medicis mors saeva nefandis  
 Suppliciis, bis sancta vetant tunc numina divum,  
 Namque sacerdotes cuncti cunctaeque puellae  
 Vestales votis exorant numina castis.
- 250 Nec viduae precibus cessant orare pudicis  
 Nec pia turba vacat lachrimis atroque dolore.  
 Sic patriae servata salus patriaeque parenti.  
 Nam versae mentes profugum dimittere Cosmum  
 Exilioque gravi pressum, non amplius ulla
- 255 Mentio facta necis, prospectum credit abunde  
 Quisque sibi, talem modo possint pellere civem  
 Et patrio privare solo; sic tempore lustris

- Extorrem complere iubent urbemque Patavi  
Describunt sedes, ubi maestam ducere vitam  
260 Possit et iniusso liceat decedere nusquam.  
Sed prius haec Medices magna ad subsellia ductus  
Voce refert humili et dulci sic pectore fatur:  
„Si notum, excelsi domini, certumque maneret  
Publica nunc solum nostra fundata ruina  
265 Otia posse diu durare et vivere longe,  
Mors mihi grata foret, nunquam metuenda doloris  
Poena meam posset vel magnis flectere mentem  
Suppliciis, nam vestra libens nunc iussa facesso,  
Si modo, quod cupio, possint afferre quietem  
270 Civibus et patriae divinae gaudia pacis,  
Neve Italas tantum valeam discedere terras  
Atque Patavinas placidas mihi ponere sedes,  
Sed longinqua maris possim nunc litora magni  
Quaerere et extremos vivens habitare per Indos.  
275 Nam mihi nulla potest res intoleranda videri,  
Quam iubeant domini et quae nostrae conferat urbi.  
Cuncta sed obtestor sanctorum numina divum  
Nil magis in nostra mihi nunc doluisse ruina,  
Quam timor immensus, ne quid res publica damni  
280 Ferret ob ingentes, quos vidit quisque, tumultus.  
Si quid enim in me collatum crudele fuisset,  
Id breve nempe foret, nam semper conscia recti  
Mens mihi venturae spondebat gaudia vitae.  
Sed magis angebat patriae immedicabile vulnus,  
285 Quod fore perpetuum rebar multisque dolendum.  
Compositis postquam rebus nunc cuncta quiescunt,  
Unius exilio nullo est subeunda dolore  
Poena mihi, at laetis animis et mente quieta  
Parendum dominisque meis patriaeque cavendum.  
290 Ergo libens vestris laetusque obtempero iustis  
Discedensque meos vobis patriaeque salutem  
Commendo supplexque deum nunc deprecor ipsum,  
Protegat hanc urbem, tum cives protegat omnes  
Et mihi concedat patienter ferre dolorem  
295 Amissae patriae et durae discrimina sortis.“  
Dixit, at ingenti dudum perculsa dolore  
Corda virum tales Medicem dum fundere voces  
Audirent, poterant oculis haud ultima siccis  
Percipere orantis, neque enim, si forte liceret,  
300 Tunc Medicem vellent iussis parere superbis.  
Nam quoscunque gravis cives iam cura remordet  
Insontem damnasse virum patriamque parentem  
Privasse et plebi miserae amovisse patronum.  
Et, quoniam suspectus erat furor improbus ingens  
305 Quorundam, ne forte necis tam dira cupido

- In Medicem ruere assumptis impelleret armis,  
Ipse magistratus magna comitante caterva  
Incolumem proprias Cosmum deducit ad aedes.  
Illic multa suis constanti pectore fatus  
310 Hortatur, quos ipse videt venisse paratos  
Hortandi causa, quos cernit denique maestos,  
Solatur natumque vocat dehinc nomine Petrum,  
Solutus et ad solum submotis omnibus inquit:  
„O dilecte magis vita et mihi carior ipsa  
315 Nate, meis solum afflictis spes unica rebus,  
Immensum video nunc te cepisse dolorem.  
Et merito, quoniam a nostris nil tale meremur  
Civibus ingratis. Oculis sed conspicit aequis  
Cuncta deus finemque dabit quandoque labori.  
320 Eia age, tolle metum et tristi iam parce dolori  
Et modo, quae carus genitor mihi rettulit, audi,  
In somnis maestum solatus imagine clara  
Et nitidis oculis, poterant qui vincere nigras  
Carceris obscuri tenebras lucemque referre,  
325 Attonitumque novo me sic splendore locutus:  
„Nate, mihi carus quondam, dum vita manebat,  
Nunc magis acceptus summa pietate, parentes  
Qua colis usque tuos, precibus nec desinis unquam  
Exorare deum castis et dona referre,  
330 Ut pater omnipotens delictis parcat iniquis  
Aeternamque ferat requiem veramque salutem.  
Sed iam purgatos laetus iam nosce parentes  
Gaudentesque frui divino lumine semper.  
Nunc ad te venio claro demissus Olympo,  
335 Missus et a summo, qui vultu cuncta sereno  
Laeta facit, pacemque suis tibi nuntio dictis.  
Laetari ergo licet, fili dilecte, reperta  
Pace dei curasque decet depellere tristes.  
Ast opus est animis et forti pectore, nate,  
340 Sors subeunda, licet nimis ac nimis aspera primum  
Contingat; patria sed enim privabere dulci  
Extorrisque novas cogeris quaerere sedes.  
Sed dolor iste brevi mitescet tempore, namque  
Haud semel hinc totum radiis sol circuit orbem,  
345 Quin humeris patriae summoque reductus honore  
Urbis Tyrrhenae felix tractabis habenas,  
Securus rerum composita pace quiesces.  
O quam felici succedent cuncta tenore,  
Namque inter cives natos fulgere videbis  
350 Ingenti virtute tuos patriamque tueri  
Consiliis famaue piis extollere factis  
Atque inter natos magnum mirabere Petrum,  
Publica dum tractat solus, dum cuncta gubernat

- Ingenio praestans, summa et pietate decorus.  
 355 O qualem laetus cernes hunc tollere prolem,  
 Quae patrias inter laudes et nomen avitum  
 Emicet et magno semper splendore nitescat.  
 Ergo age, ne somno, falsa vel imagine ludi  
 Credas, immo fidem dictis appone paternis,  
 360 Verus enim a vero missus tibi nuntius adsum.  
 Haec ait et subito in tenues evanuit auras  
 Meque patris cari cupientem tangere dextram  
 Plurave quaerentem solum inter verba reliquit.  
 Nunc igitur forti subeamus pectore, quicquid  
 365 Fata mali tradunt, sperantes vera locutum  
 Esse patrem et iam certa fides his affore dictis  
 Cernitur atque utinam simili ratione sequantur  
 Caetera, ut in primis apparent omnia rebus  
 Tuta satis maiorque mihi fiducia semper  
 370 Crescit et, in melius veritas, precor, omnia, nate,  
 Et mecum pariter monitis laetare paternis.  
 Candida nec roseis fulgens Aurora quadrigis  
 Rettuleratque diem et nigras disiecerat umbras,  
 Cum primum populi magnus concursus ad aedes  
 375 Fit Medicas, alios visendi cura fatigat  
 Atque salutandi, nonnullos causa iuvandi  
 Consilio atque opibus movet, omnibus intima cordi  
 Cura manet certusque dolor, ne plura subinde  
 Civibus ac patriae, quam Cosmo, damna resultent.  
 380 Quippe dolor talem patriam decedere civem,  
 Qui bona multa bonis, qui plurima conferat urbi  
 Commoda, qui propriis praeponat publica rebus.  
 Profugium miseris tutum, proventus egenis  
 Certus et afflictis placidum solamen amicis.  
 385 Haec inter se certatim dum verba loquuntur,  
 Dum Medicem cupiunt abeuntem cernere Cosmum  
 Expectantque foris avidi, tum maximus heros  
 Progreditur iuvenum multis stipatus et armis  
 Et magno conspectus equo mediusque duorum,  
 390 Qui legum arbitrium summumque insigne gerebant  
 Oclo virum, quorum praesens reverentia tutum  
 Tum Medicem posset patrios perducere fines.  
 Qualem saepe virum conspectum cernimus urbem  
 Intransentem nostram, populus cui plurimus exit  
 395 Obvius et proceres medium comitantur euntem.  
 Ille venit laetusque hinc atque hinc lumina flectit  
 Fronteque demissa tanto respondet honori:  
 Talem se Medices hilari cum fronte gerebat,  
 Talis erat, quamvis per opaca silentia noctis  
 400 Pergeret et profugus patriis excederet oris.  
 Ecce propinquabant portis, nec desinit ullus



- Pone sequi, donec portas egressus abiret;  
 Namque vetant ultra portae procedere quemquam,  
 Sed taciti intra se hac abeuntem voce sequuntur:
- 405 „I felix nostrique memor lucemque reporta  
 Quamprimum rediens, nam caeca in nocte relinquis  
 Nunc sine te miseros nigraque vagamur in umbra.“  
 Liquerat interea humentes nox frigida terras  
 Rettuleratque diem fulgens iam Lucifer alnum
- 410 Famaque vicinos volitans exciverat omnes,  
 Dum Medices abiens Pistori intraverat agros.  
 Ecce catervatim descendunt montibus altis  
 Audaces fortesque viri et, fera corpora, agrestes,  
 Qui soliti in silvis et duris semper in armis
- 415 Versari et vitam magnis offerre periclis,  
 Turba ingens Cosmumque piis obnoxia factis  
 Increpat his Medicem dictis et vocibus audax:  
 „Quo ruis, o demens, iussisne paratus iniquis  
 Parere et patrias exul sic linquere sedes?
- 420 Quid dubitas nostris fretus nunc viribus urbem  
 Et regredi et Medicas armis ostendere vires  
 Civibus iniustis fortemque resumere mentem.  
 Namque vides, quot sumpta viris nunc arma salutis  
 Prompta tuae maneant, pro te quoscunque libenter
- 425 Aspicias cunctis vitam obiectare periclis,  
 Vulnera sive feram nequaquam horrescere mortem.  
 Sed deus adiutor coeptis nunc affore iustis  
 Cernitur; ecce deus reditus tibi monstrat apertum  
 Nunc iter et certe apparent tibi signa salutis.
- 430 Ergo facultatem redeundi amittere talem  
 Ne velis, at, facili, propera, dum cardine sistit;  
 Nam neglecta semel nunquam fortuna redibit.“  
 At pius haec contra Medices:
- „Dulces mihi semper  
 Et cari et fidi cunctis in rebus amici.
- 435 Sed nunc vestra fides longe mihi carior extat,  
 Dum fortuna meis gestis invisa secundis  
 Cogit in adversos miserum descendere casus.  
 Quod mihi nunc sumptis mortem spondetis in armis  
 Oppetere et videam dictis succedere facta,
- 440 Nil mihi nunc potuit magis hoc contingere gratum  
 Oblatumque libens grata nunc mente repono.  
 Fas et iura vetant armis nunc talibus uti  
 Et contra patriam vires extendere nostras.  
 Quemque decet iustum dominis parere libenter
- 445 Et patriae servare fidem pacemque tueri.  
 Ergo libens, licet immeritus, nunc iussus abire  
 Discedo patriaeque meam concedo salutem.  
 Vos igitur laeti vestras discedite sedes

- Et meritis tantis adstrictum ducite Cosmum,  
450 Nec, si fata velint, isthaec egisse pigebit."  
Sic iter inceptum peragit nec porrigit aures  
Talibus oblatis dictisque ferocibus unquam,  
Quamvis incessu peditum iam copia crescat  
Factaque sit iusti vel magni exercitus instar.  
455 Inde Mutinenses superatis montibus agros  
Ingreditur cernitque viros equitumque catervas  
Obviam adesse sibi, Estensis quos pergere princeps  
Iusserat et comiter fines deducere in omnes.  
Sic paribus studiis Medices susceptus ubique  
460 Tendit iter, donec proscriptas tangeret oras.  
Illic, proh superi, quanta admiratio cunctos  
Detinet et quanto qualique receptus honore.  
Ingens quippe viri semper reverentia crescit,  
Vincit et acceptam Cosmi praesentia famam.  
465 Ecce Patavinus populus fluit undique totus  
Visendi studio; quisquis vir magnus in urbe  
Obvius egreditur, blando et sermone salutat.  
Haud aliter magno Medicem dignatur honore  
Ipse magistratus, quam si venisset ad urbem  
470 Orator vel si titulos praeferret honestos  
Nobilis aut princeps et digno nomine clarus.  
Namque iubet procures medium deducere Cosmum  
Hortarique virum semper cunctisque diebus  
Mane salutatum Medicas accedere ad aedes.  
475 Quod faciunt laeti cives nullumque relinquunt  
Officium intactum summi ac praestantis amoris.  
Quin etiam Veneti mittunt, qui voce senatus  
Hortentur Medicem et dictis solentur amicis  
Spemque bonam moneant adversis sumere rebus  
480 Et, tales postquam tulerit fortuna labores,  
Gaudendum, Venetas quod sorte advenerit oras;  
Namque deesse nihil speret sibi posse, nisi urbis  
Tam pulchrae aspectus, qualem Florentia praestat.  
Caetera, ad humanam quae spectant commoda vitam,  
485 Si non aequa, tamen minus aspernanda futura.  
Milia praeierea auri quinquaginta manere  
Prompta sibi, si forte suis discrimina rebus  
Obtigerint, valeant quae solum talibus armis  
Expelli, sed plura quidem, si pluribus uti  
490 Expediat Medici, Venetos offerre paratos.  
His Medices dictis et tali munere laetus  
Immensas Venetis grates compluribus egit  
Verbis et, quoniam misero sibi nulla facultas  
Posse referre datur, divum se cuncta precari  
495 Numina, ut ipsa ferant Venetis, quae digna videntur,  
Praemia, qui profugum tanto dignentur honore.

Sic igitur claro notus iam nomine Cosmus,  
 Talibus et Venetum donis ornatus honestis  
 Inter primates urbis iam primus habetur.  
 500 Sic Cisalpinas celebris volitare per oras  
 Incipit inque dies virtutis gloria maior  
 Emicat et nitido semper fulgore coruscat.  
 Sic quoque finitimis veneratur in urbibus atque  
 Talibus ac tantis effertur laudibus heros,  
 605 Ut Venetos patres reliquosque incenderit omnes  
 Fama viri, Venetam Medices si pergat ad urbem,  
 Tum patrio donare solo, tum nomine civis  
 Ornare et proprias in Cosmum condere leges.  
 Quae quamvis miris exoptet munera votis  
 610 Et cupiat tantis ornare insignibus heros,  
 Attamen iniussu populi decedere nunquam  
 Sedibus ascriptis sibi posse licere fatetur,  
 Nec modo, si liceat, sedes se dictitat ullas  
 Quaerere velle, nisi gratum sciat esse futurum  
 615 Florenti populo dominisque potentibus, unde  
 Omne sibi debet cedendi sive manendi  
 Arbitrium tradi, licet exul longius erret.  
 Nam patriis semper subiectum legibus esse  
 Quemque volunt leges, patrium si perdere nomen  
 620 Dulce nolit fugiatque rebellis nomen acerbum.  
 Ergo petita prius venia et concessa libenter  
 A populo, quascunque velit, discedere sedes.  
 Nec mora, concedit Venetas habitator ad aedes,  
 Laudis ubi egregiae et virtutis praemia sacrae  
 625 Invenit titulis referens insignia pulchris,  
 Dicere quae paribus verbis et carmine digno  
 Difficile est, sed nota manent memoranda per aevum  
 Plurima, quae Medicam ornabunt per saecula gentem.

## LIBER III.

Dum Medices Venetis summa cum laude moratur  
 Sedibus atque inter cives dum magnus habetur  
 Dumque suum patribus virtus commendat alumnum,  
 Maesta gemit semper dulcem Florentia natum  
 5 Decessisse suum caroque orbata parente  
 Continuo in luctu et lachrimis versatur acerbis.  
 Saepe virum veluti crudeli morte peremptum  
 Casta dolet coniunx et maestis cuncta querelis  
 Tecta replet late, resonat vicinia planctu  
 10 Femineo, spargit flavos per colla capillos,  
 Corporis omne decus, vestitus negligit omnis  
 Vesteque lugubri amissum deplorat amorem.  
 Sic pariter nostra tum passim maeror in urbe

- Cernitur et patria ingenti confecta dolore  
15 Munera quaeque sinit, fuerint seu publica curis  
Expediunda suis, cunctis neglecta diebus  
Profluere atque situ confecta albescere turpi,  
Seu privata manet patriae coniuncta saluti,  
Ceu nihil ad patriam videas torpescere semper.  
20 Non secus, ac gelidae cernas cum tempore brumae  
Cuncta rigere gelu et glacie concreta iacere.  
Namque oblita sui penitus rerumque suarum  
Nil, nisi quod possit tantum lenire dolorem,  
Cogitat, unde sibi multis discrimina rebus  
25 Proveniunt, illinc rapidis lacerata rapinis,  
Hinc aliis submersa malis, ceu navis, in altum  
Quae subit adversam ventorum forte procellam,  
Neve gubernator nec doctus in arte magister  
Ullus adest illi, qui consulat atque gubernet,  
30 Naufraga sed rabidis ventis iaculatur et undis  
Et iactata diu portus non invenit ullos.  
Civica sic patriam versat dissentio nostram  
Ambitioque feris submersit fluctibus illam,  
Neve quies ac ulla datur spes certa salutis,  
35 Sed vidua assidue nullo tutore relicto  
Diripitur ceditque malis et languida luget.  
Publica iura vacant, cedit civile potentum  
Viribus atque armis, tum pro ratione voluntas  
Cuncta gerit, tum prompta subit metuenda libido.  
40 Quin et sacra deum cunctis solemnia templis  
Cessant et solito nusquam celebrantur honore.  
Quae delubra novo fuerant ornata decore,  
Iam deserta manent amotis undique sacris.  
Sicque suum cernens tam parvo tempore nomen  
45 Relligio, Etrusca quod magnum semper in urbe  
Gesserat indictum nullis venerarier aris,  
Haec secum volvit magno perculsa dolore:  
„Cum pius Etrusca discederet exul ab urbe  
Pulsus ob invidiam Medices, permagna putavi  
50 Damna futuri mihi, nam multis saucia curis  
Angebar primum iniungi discrimina nato  
Tanta meo, cum nulla extaret causa malorum,  
Praemia sed meritis potius sibi debita magnis.  
Flumina praeterea nostris uberrima plantis,  
55 Quae Medico semper pleno de fonte fluebant,  
Diverti e campis alio conversa dolebam.  
Non tamen, ut video, avulsas radicibus imis  
Credideram plantas, ne ferrent amplius ullos,  
Ut solite, fructus, semper quos esse feraces  
60 Et memini et plenis collegi cratibus olim,  
Non etiam incultos impleri sentibus agros

- Arvaeque submotis Medicis arescere rivis.  
 Ergo necesse novas quam primum quaerere sedes  
 Et Florentina decedere protinus urbe,  
 65 Urbe mihi cunctis grata magis urbibus olim.  
 Sed promissa dei memori nunc mente revolve,  
 Scilicet absentem revocari ad publica Cosmum  
 Munera transactis nonnullis mensibus, unde  
 Spes mihi certa manet; vereor sed plurima, quae nunc  
 70 Accusant magno Tyrrhenam crimine gentem,  
 Ne pater omnipotens gestis iratus iniquis  
 In longum promissa trahat populumque severus  
 Puniat ingratum, maneant cum praemia Cosmo  
 Digna satis, Veneta quae nunc ex urbe reportat,  
 75 Quae valeant mentis placidam sibi ferre quietem,  
 Unde prius iunctis orabo numina palmis  
 Magna dei, videat, ne quid mereantur iniqui,  
 Sed quid digna pii Medicis nunc facta requirant  
 Damnaque conspiciat, quae nobis magna resultant.  
 80 Talibus ergo deum dictis et corde precabor:  
 „O deus, humano generi qui parcere semper  
 Gaudes, nec scelerum iratus reminisceris unquam,  
 Te precor, avertas oculos, licet impia multis  
 Extent facta malis in te commissas per urbem  
 85 Etruscam, ingratasque bonus ne respice mentes,  
 Sed moveat Medicis pietas cultusque deorum  
 Et mea te tangant sumptis incommoda damnis.  
 Advenit ecce dies nobis promissa; parentem  
 Restituas, oro, patriae, quae languida semper  
 90 Luget et absentem luctu deplorat acerbo,  
 Et mihi concedas divinae sortis honore  
 Posse frui solito, quem secum ferre necesse est,  
 Cum secum pariter Tyrrhena excesserit urbe.“  
 Talia Relligio; tum summi rector Olympi  
 95 Rettulit haec contra:  
 „Tuus, o sanctissima virtus,  
 Me dolor et Medicis pietas nil tale merentis  
 Impellunt gratis ingratae ignoscere genti.  
 Vade, age, dic Medici, patriam mox praeparet ire,  
 Nam redditus concessa sibi nunc certa potestas.“  
 100 Inde vocat subito ex nymphis caelestibus unam,  
 Quae radiis semper casti resplendet amoris;  
 Talibus alloquitur dictis et talia mandat:  
 „Gratia grata mihi, quia gratum reddis honorem  
 Numinibus sanctis resque intercedis honestas,  
 105 Nec praestare boni quicquid mortalia possunt  
 Te sine corda virum. Florentinam ocus urbem  
 Advola et actutum mentes incende virorum,  
 Ut revocent ultro Medicem patriaeque parentem

- Restituant meritique sibi reddantur honores.“  
110 Nec non et summi peragit mandata tonantis  
Gratia, nam liquidas pennis dilapsa per auras  
Advolat Etruscas aura velocior arces  
Atque adeo procerum mentes et corda virorum  
Irrepat et tanto in Medicem succendit amore,  
115 Ut subito tentet revocare ad publica Cosmum  
lura magistratus, quamvis furibunda minetur  
Factio et adversis obsistat viribus audax,  
Impleat et totam magnis terroribus urbem.  
Contio sed populi magno celebrata favore  
120 Comprimit audaces dirosque per omnia cives  
Et revocat Medicem solitoque in culmine rerum  
Collocat et meritos reddi sibi mandat honores.  
Relligio interea Vestalis virginis ora  
Et vestes induta sacras victasque pudicas  
125 Accelerans gressus Medicas contendit ad aedes  
Et placida Medicem voce introgressa salutat:  
„Salve, cura deum, et veram, quam porto, salutem  
Accipe nec mirare tuas accedere solam  
Hac cum veste domos ausam, nam iussa facesso  
130 Magna dei patriasque libens tibi nuntio sedes  
Restitui et magna in patriam cum laude vocari.“  
Dixit et extemplo pariter cum voce recessit.  
At Medices tali stupefactus imagine primum  
Virginis atque habitum et faciem admiratus honestam,  
135 Mox secum repetens audita ex ordine verba  
Haud dubiam praestare fidem de sedibus altis  
Advenisse deam et divum mandata tulisse,  
Sed, quibus e meritis mandentur talia, nescit.  
Sic igitur firmum fixumque in mente reponit  
140 Se, Florentinam quam primum advenerit urbem,  
Viderit et patriam, sacras componere leges  
Compositasque suos cives servare libenter,  
Numina magna deum votis sacrisque peractis  
Saepe vocaturum et grates quascunque laturum  
145 Pluraque marmoreo structurum templa decore.  
Postera fulgebat radiis Aurora coruscis,  
Cum Venetas velox advenit nuntius oras,  
Detulit et, quanto Medices revocatus honore  
In patriam quantumque suis iam civibus adsit  
150 Gratus et acceptus, redeat modo laetus ad urbem,  
Quae Medico tantum ardens inflammatur amore,  
Quantum casta virum uxor amat vel mater alumnum.  
Nec mora; continuo Florentis iussa senatus  
Expedit Etruscam Medices rediturus ad urbem.  
155 Iamque Mugellanos fines ingressus et agros  
Audiit ingentem populi adventare catervam

- Obviam et egressos procures iam protinus omnes.  
 Quod minime cernens privatos posse decere  
 Diversum per iter Tyrrhenam pergit ad urbem,  
 160 Quam tacitus paucis tantum comitantibus intrat,  
 Dirigit et primos ad magna palatia gressus,  
 Laetus adit dominos, dulci et sermone salutatur  
 Et grates agit ingentes veniamque precatur.  
 Laetitia subito complentur corda virorum  
 165 Ingenti et populus nimium gestire videtur  
 Non aliter, quam saepe novus si nuntius affert  
 Seu victos hostes urbesque ex hoste receptas  
 Seu gratam cunctis post multa pericula pacem.  
 Neve magis reduci mater laetatur alumno,  
 170 Unicus ille licet viduae sit cura parentis,  
 Cum redit emensus variis labentia terris  
 Aequora et obscurae passus discrimina mortis,  
 Quam patria incolumi Cosmo est gavisa recepto,  
 Cui commendat opesque suas rerumque salutem.  
 175 Nec minus ille suae curas amplectitur urbis,  
 Quam pater ipse domumque suam natosque gubernat.  
 Publica cuncta brevi — tanta est prudentia Cosmi —  
 Consiliis composta suis servare tenorem  
 Incipiunt solitum priscamque resumere normam.  
 180 Seditione viri soliti turbare quietem  
 Antiquam patriae poenis plectuntur acerbis,  
 Praemia nec desunt iustis iam civibus ulla.  
 Sic igitur patrius pulchre componitur ordo  
 Iamque sacras leges cives venerantur et omnis  
 185 Plebs patribus subiecta manet legesque veretur.  
 Hinc per te, Medices, Laurentis templa Levitae  
 Cernuntur Fesulis magnis suffulta columnis  
 Auratoque nitent passim laquearia tecto.  
 Hinc delubra tibi, Marce, instaurata nitescunt  
 190 Porticibusque pii fratres spatiantur honestis.  
 Bibliotheca libros miro constructa decore,  
 Sive sacros quaeras seu quos gentilis honorat,  
 Fratribus et reliquis large quoscunque ministrat.  
 Hinc Fesuli montis positum in radicibus alti  
 195 Cernitur erectum pulchra testudine templum  
 Tectaque cernuntur monacis habitanda pudicis  
 Splendida et obducti circum viridaria muri.  
 Denique signa pilis insertis aurea rubris  
 Omnibus in templis tota spectantur in urbe.  
 200 Hinc quoque regali fabricata palatia sumptu  
 Advena miratur, cives mirantur et omnes.  
 Nec minus interea patriae indulgere quieti  
 Cernitur et curas animo gestare salubres.  
 Namque foris bellum firmata pace resedit

- 205 Horribilisque domi subito discordia cessit,  
 Reddidit et cautos ad cuncta pericula cives.  
 Quod Piccininus suscepta clade fatetur,  
 Cum fugit amissis et fracto milite castris,  
 Franciscusque comes puppi decedere iussus
- 210 Valle Casentina, adversi dum principis arma  
 Sectatus nostra demens defecit ab urbe,  
 Testanturque feri insultus atque irrita bella  
 Alfonsi regis, multis dum milibus ardens  
 Obsidione gravi Plombini moenia cinxit
- 215 In moremque fugae raptim obsidione soluta  
 Navibus in patriam levibus remeare coactus.  
 Sed quo divinae referam praesagia mentis  
 Carmine et instantis praevisa pericula belli?  
 Quis deus ingenio poterit praestare favorem,
- 220 Vestrum opus, o Musae, vestra haec sit cura, precamur.  
 Nam nihil absque opibus vestris speramus honestum  
 Posse loqui; vestra haec iterum sit cura, precamur.  
 Mors ducis Insubrium cunctis pergrata Philippi  
 Horrida multorum mentes ad proelia vertit
- 225 Cordaque praecipue Venetorum fervida tinxit  
 Ambitione gravi, cuperent ut regna Philippi  
 Cedere cuncta sibi, nam motis undique bellis  
 Armorum strepitu videas horrescere totam  
 Italiam et subito consterni cuncta tremore.
- 230 Hinc rex Alfonsus violata pace tremendus  
 Imminet et bellum nobis cladesque minatur.  
 Illinc et Venetis vexatur Gallia castris,  
 Gallia defuncto quondam subiecta Philippo,  
 Sed duce Francisco correptis Insuber armis
- 235 It contra et cara pro libertate repugnat;  
 Inclita facta gerit, magno et discrimine clades  
 Iniungit Venetis; iustus nam iusta rependit  
 Iura deus iustosque fovet reprimitque superbos.  
 Mox tamen adiuncto sibi Sforza et foedere firmo
- 240 Insurgunt iterum Veneti cladesque vicissim  
 Insubribus referunt iamque urbis moenia cingunt  
 Milite et effosso circundant aggere muros.  
 Iamque fame impulsus positus iam cogitur armis  
 Insuber optatam precibus perquirere pacem,
- 245 Cum Veneti sese violato foedere iungunt  
 Insubribus pactosque negant persolvere nummos  
 Francisco, sed castra iubent dissolvere et ipsum;  
 Finibus Insubrium quam primum abscedere mandant.  
 Tum demum Medices divina mente volutans,
- 250 Quid totiens firmata velint totiensque soluta  
 Foedera deposcant, Venetorum quippe timendas  
 Aestimat ambages et magna pericula cernit,



- Consiliis ni forte bonis opibusve iuветur  
 Franciscus Venetum monitus contemnere iussa,  
 256 Castra nec Insubrium obsessis deducere campis.  
 Sic monet, ut fervens obsessis acrius instet  
 Moenibus utque novis obsessam cladibus urbem  
 Terreat et nusquam sumptis discedat ab armis.  
 Quippe suas iam noscat opes sibi quasque paratas  
 263 Affore, nec magnis desperet sumptibus ullis  
 Sufficere et solum tanto se occurrere bello  
 Posse, sed adiutus vires animumque resumat.  
 Namque sibi sciat et Medici commune futurum  
 Id bellum, quod fata dabunt succedere felix,  
 266 Si modo persistat solitis in viribus audax.  
 Talibus impulsus dictis opibusque reffectus  
 Sforziades tantis replet terroribus urbem  
 Obsessam, ut magnus magno clamore tumultus  
 Aestuet arreptisque ruat populariter armis  
 270 Insuber et Venetum crudeli vulnere caeso  
 Legato, portis murisque patentibus hostem  
 Intra tecta vocet summoque in culmine rerum  
 Constituat mandetque suam per saecula gentem  
 Mandatis parere suis et iussa vereri.  
 275 Annuit oblati rerumque capessit habenas  
 Sforziades laetus populique favore secundo  
 Insubrium componit opes et cuncta gubernat.  
 At Venetis livor tum fervens cordibus ira  
 Aestuat ereptumque dolent e faucibus amplum  
 280 Imperium mortemque sui tum saeva retractant  
 Vulnera legati; stimulat vindicta furentes.  
 Hinc sibi coniungunt firmato foedere regem  
 Alfonsum nostramque fidem veteremque requirunt  
 Gentis amicitiam et socialia iura recensent.  
 285 Vertitur ad Venetas populi sententia partes  
 Antiquumque patres renovari foedus et arma  
 Haud iniusta capi Venetum pro parte fatentur  
 Et secura magis; delendum quippe tyranni  
 Nomen et in cunctis civilia iura tuenda.  
 290 Et licet eventus Martis communis utrisque,  
 Attamen ad Venetos felix spectare videtur,  
 Sint quibus et vires rerumque potentia maior  
 Sitque vel ad magnos immensa pecunia sumptus.  
 Praeterea spes magna monet protendere fines  
 295 Posse vel imperium late producere nostrum.  
 Namque Padum citra quicquid dicionis habetur  
 Insubrium, nostris Venetis cedentibus omne  
 Accedet titulis, regni spes, nulla potestas  
 Transque Padum Venetas servabunt omnia **leges**,  
 300 Sic erit in magnis aequata potentia rebus.

- Contra nulla viget regni spes, nulla potestas  
 Vincendi nullusque favor, sed certa malorum  
 Congeries certusque dolor patriaeque ruina.  
 Hae passim tota voces vulgantur in urbe.
- 306 At Medices alto coniectans corde futura  
 Publica, quem solum tangebatur cura salutis.  
 Conventu in magno populi cunctique senatus  
 Talibus incepit tumque his est vocibus usus:  
 „Res magna, o cives, et magni plena pericli
- 310 Postulat, ut, quisquis patrium sectatur honorem  
 Et libertatis servari nomen honestum  
 Affectat patriae postponens cuncta saluti,  
 Proferat in medium, si quid sibi forte cavendum  
 Apparet, subeatque libens quoscunque labores
- 315 Pro patria et vitam pro libertate recuset.  
 Nobiscum Veneti renovari foedera poscunt.  
 Pluribus illa quidem non aspernanda videntur,  
 Nec mirum, quoniam patriae conferre saluti  
 Rentur et ex illis augeri publica censent,
- 320 Nec mihi displiceant, illud modo facta sequantur.  
 Sed vereor, ne forte magis confecta ruinam  
 Attulerint patriae vel libera iura resolvant.  
 Nam regni titulis caecaque cupidine ductos  
 Fingere cuncta reor Venetos et quaerere solum,
- 325 Deserat ut bellum positis exterritis armis  
 Sforziades nullisque opibus nulloque favore  
 Suffultus tantis succumbens sumptibus erret.  
 Gallia tum demum dubiis dum partibus haeret  
 Dumque suos cernit vexari cladibus agros
- 330 Fessa iugum subitura suum, tum denique totis  
 Viribus Italiam contentur subdere totam.  
 Et faciant, ni bella ferox incepta sequatur  
 Sforziades opibus nostris suffultus et armis.  
 Nec belli sumptus Venetumque potentia quemquam
- 335 Terreat; haud quisquam belli desperet honestos  
 Eventus fore, nam felix victoria fortem  
 Sforziadem sequitur, iam victis impiger instat  
 Hostibus Insubriumque potens dominatur in urbe.  
 Quod si Tyrrheni inspiraverit aura leonis,
- 340 Nimirum plenis transvectus in aequora velis,  
 Quosque velit, liceat tutos acquirere portus.  
 Quare agite, o cives, animis insurgite laetis  
 Suspectosque nimis vobis nimiumque potentes  
 Nunc duce Francisco Venetum deprimate fastus
- 345 Et rerum eventus faustos sperate futuros.“  
 Dixerat haec Medices; simul omnis curia laudat  
 Consilium Medicis; patriae nam cura salutis  
 Admonet instantes iterum perpendere casus,

- Ergo petita negant renovari foedera neve  
 350 Cum Venetis aliqua sociari lege, sed omnes  
 Bellorum casus et tristia facta vereri  
 Insubriumque ducem, quoniam ascivisse volentes  
 Audierint, nullis arcendum viribus atque  
 Marte lacessendum nullo cum iure videri.
- 355 Hinc ira atque odiis et aperto Marte furentes  
 Ardescunt Veneti, quin improbus omnia vertit  
 Iura furor; Venetis subito nam finibus acti  
 Quique Flumentini; nunquam concessa potestas  
 Legatis nostris Venetas accedere ad oras.
- 360 Tum demum patribus Cosmo suadente receptus  
 Sforziades socius sancitaque foedera sacris  
 Legibus et nostros olim iunctura nepotes.  
 Quae simul et patriam recte servasse salutem  
 Quis neget et stabilem pariter fundasse quietem
- 365 Italiae et Venetum fastus domuisse potentes?  
 Nam licet horrendas bellorum Gallia clades  
 Senserit et turmas equitum peditumque catervas  
 Insultare suis Veneto sub nomine campis  
 Viderit et duras tulerint vastata ruinas,
- 370 Nec non et Calabrum Campano milite princeps  
 Praedatus Thuscos magna formidine saltus  
 Terrores nostrae magnos iniecerit urbi,  
 Non tamen instantis belli percussa tumultu  
 Gallia succubuit, non ipsa Etruria tantis
- 375 Cladibus ingemuit, quin sumptis protinus armis  
 Illinc et Venetas acies excedere cogunt,  
 Hinc et Campanas nullo discrimine pellunt,  
 Quin et Francorum regem regemque Renatum  
 Foedere coniungunt. Superatis Alpibus ardens
- 380 Ipse Renatus adest multis cum milibus, unde  
 Et Venetis metus et tum regni cura tuendi  
 Iniicitur regi; tum pacis mentio facta  
 Et firmata inter Venetos Thuscumque senatum  
 Sforziademque ducem demum sancita per omnes
- 385 Italiae populos spatio servanda trilucri.  
 Bellorum postquam terror submotus et omnis  
 Armorum strepitus placidae cessere quieti,  
 Maior inest Medici firmandae cura quietis  
 Concordemque suis pariter coniicere mentem
- 390 Civibus et veteres rixas abolere nefandas  
 Et leges sancire sacras populumque severis  
 Moribus instruere et priscas inducere normas.  
 Non labor incassum, sumptus non ipsa fefellit  
 Cura virum, nam cuncta domi composta quierunt
- 395 Publica, tumve foris tantum reverenda senatus  
 Etruscas inter gentes populosque propinquos

- Floruit auctoritas, ut Florida lilia quisque  
Laudibus in caelum et verbis extolleret amplis  
Optaretque simul coniungi foedere sacro.
- 400 At Medices amplum populi Florentis honorem  
Tam celebrem cunctas Italas volitare per urbes  
Prospiciens stabilemque domi per longa quietem  
Tempora mansuram, nec non et dulcia cernens  
Affore compositis externis otia bellis,
- 405 Talibus ad natum placidis est vocibus usus :  
"Petre, meis semper cunctis spes unica rebus,  
Iam narrasse tibi memini longo ordine cuncta,  
Quae ventura mihi cari genitoris imago  
Dixerat, obscurus clausum dum carcer haberet.
- 410 Vera quidem cernis transactis omnia rebus  
Haud finem sortita malum, sed prospera semper  
In melius conversa. Fidem meliora futura  
Non aliter, quam dicta tibi praesagia praestant.  
Passibus haud lentis tristem adventare senectam
- 415 Ipse vides secumque graves afferre dolores.  
Onera cuncta libens humeris iam subtrahe nostris,  
Nam breve, quod restat, spatium sibi poscit inanes  
Deponi curas rebusque incumbere certis.  
Et licet hoc teneris fuerit mihi semper ab annis
- 420 Ante oculos, iniuncta tamen discrimina multis  
Avertere modis. Testor pia numina divum  
Invitum traxisse moras dubiosque senectae  
Expectasse dies, summi sed rector Olympi  
Intus cuncta videns cordis secreta rimatur.
- 425 Haud equidem infitior magnos instare labores,  
Singula dum tractas privata et publica solus.  
Sed labor iste brevi minuetur tempore, namque  
Talia iam video Laurentis signa nepotis,  
Mox ut cuncta sibi tuto committere possis.
- 430 Hic tibi non tantum commissa negotia promptus  
Expediet, sed cuncta procul praevisa subibit.  
Accipe, quae nostram Laurenti a nomine sumpta  
Haud temnenda quidem pascunt prognostica mentem.  
Laurea sarta vides doctos ornare poetas,
- 435 Cingitur hac etiam felix victoria fronde.  
Ingenio praestans studiis fulgebit honestis  
Victoremque suum cernet Florentia civem.  
Ergo age, felici sic omine cuncta capesse  
Et gravibus curis vacuum iam redde parentem."
- 440 Haec ait et, veluti prudens doctusque magister,  
Qui maris undisoni fluctus scopulosque minaces  
Ventorumque feros ictus diramque procellam  
Saepius expertus tutos acquirere portus  
Festinat miserae fugiens discrimina mortis,

- 445 Quos ubi securus cepit, non amplius ullis  
Fluctibus aut rabidis tentat se credere ventis,  
Haud aliter Medices curas tunc exuit omnes,  
Quae possint placidam mentis turbare quietem.  
Divinis tantum properat fundare carinas
- 450 Portubus aeternam sperans haurire salutem.  
O quam felicem videas hunc degere vitam!  
Scripturae intendit solvendo aenigmata sacrae  
Cortice detecto dulces gustare medullas.  
Quid referam, quanta videas pietate decorum
- 455 In patriam civesque suos carosque propinquos?  
Quidve loquar, patiens casus ut pertulit omnes,  
Quos fortuna modis saevos tulit invida multis?  
Non nati mors dura sui carique nepotis,  
Languida non etiam concretis membra podagris
- 460 Hunc cogere virum querulas emittere voces,  
Sed rectum servare modum cumulataque magno  
Dona referre deo precibusque orare pudicis.  
Sumptibus, ah, quantis vel quali ornata decore  
Templa deum fabricanda locat, quae multa per urbem
- 465 Conspicienda manent Medicumque insignia gestant.  
His igitur studiis mentem dum pascit honestis  
Et divina domi speculatur cuncta quietus,  
Delphica ceu quondam dubiis oracula rebus  
Consultura petit falsis gens tradita divīs,
- 470 Non secus hunc adeunt cives, vicinus et omnis,  
Ut videant et certa simul responsa reportent.  
Ecce propinquabat morti vicina senectus;  
Sacra petit, iunctis sumitque vatica palmis,  
Mixta piis lachrimis demum verba ultima dixit.
- 475 Inque tuas commendo manus, pater optime, mentem:  
Non ingrata patrem patriae Florentia dixit.

## INDEX NOMINUM.

Numeri crassi (1—3.) ad libros pertinent. — D: Dedicatio (pag. 1.)

- Abda**, flumen 1, 156.  
**Alfonsus** de Aragonia, v. Aragonia, Alfonsus de.  
**Allexandrina** urbs 1, 163. **Allexandrinae** arces 1, 152.  
**Alpes** 1, 153. 3, 379.  
**Amerigus** Corsinus, v. Corsinus, Amerigus.  
**Amor** 2, 222.  
**Aragonia**, Alfonsus de, rex Neapolis 3, 213, 230, 283.  
**Apollo** (v. Phoebus) 1, 7.  
**Armenicus** princeps 1, 153, 162, 165.  
**Arnus** 1, 259, 271.  
**Augustus** dux 1, 154, 164, 182.  
**Aurora** 2, 372. 3, 146.  
**Bebriacus** (v. Philippus dux Insubrium) 1, 167, 192. — dux (v. Philippus dux Insubrium) 1, 180. — Philippus 1, 447. — tyrannus (v. Philippus dux Insubrium) 1, 132. **Bebriaci** duces 1, 30.  
**Bergamum** 1, 446.  
**Brixenses** campi 1, 155.  
**Brixia** 1, 363, 445.  
**Calabri** 3, 370.  
**Campanus** miles 3, 370. **Campanae** acies 3, 377.  
**Caponius**, Ginus 1, 252.  
**Casentina** vallis 3, 210.  
**Castalii** liquores 1, 10.  
**Cecropia** studia 1, 89.  
**Cerberus** 1, 130.  
**Christus** 1, 340, 346.  
**Cisalpini** coloni 1, 168. — Galli 1, 171.  
**Cisalpinæ** orae 2, 500.  
**Corsinus**, Amerigus D, 1.  
**Cortona** 1, 322.  
**Cupido** 2, 220.  
**Cyllenius** (Mercurius) 1, 52.  
**Delphica** oracula 3, 468.  
**Erebus** 1, 205.  
**Eridanus** 1, 189.  
**Estensis** princeps 2, 457.  
**Etruria** 3, 374.  
**Etruscus** senatus 1, 185. **Etrusca** urbs 2, 118. 3, 45, 48, 85, 154. **Etruscae** arces 3, 112. — gentes 3, 396. — terrae 1, 45. — urbes 2, 28.  
**Fesulus** mons 3, 194. **Fesulae** columnae 3, 187.  
**Florens** populus 2, 515. 3, 400. — senatus 3, 153.  
**Florentia** 1, 17, 27, 218, 230, 237, 286, 387. 2, 483. 3, 4, 437, 476.  
**Florentinus** 1, 391, 457. **Florentina** urbs 2, 82. 3, 64, 106, 140. **Florentinum** palatium 2, 29. **Florentini** 1, 318.  
**Florida** lilia 3, 397.  
**Fluentinus** senatus 1, 379. **Fluentini** 1, 306. 3, 358. — alumni 1, 91. **Fluentinae** res 1, 232.  
**Fortuna** 2, 31, 44, 104.  
**Franci** 3, 378.  
**Franciscus** Sforza, v. Sforza, Franciscus.  
**Galeactus** 1, 204, 233.  
**Galli** 1, 171.  
**Gallia** 1, 146, 193, 357. 3, 232, 233, 328, 366, 374.  
**Gallicus** furor 1, 157.  
**Gratia** 3, 103, 111.  
**Herculei** labores 1, 65.  
**Insuber** 3, 234, 270. **Insubres** 1, 337, 436. 3, 223, 241, 246, 248, 255, 277, 297, 338, 352.  
**Italiae** terrae 2, 271. — urbes 3, 401.  
**Italia** 1, 338, 344, 439. 3, 229, 365, 385.  
**Iuppiter** 1, 39.  
**Ladislaus** 1, 315.  
**Laurens** Levita 3, 186.  
**Laurentum** 3, 432.  
**Levita**, Laurens 3, 186.  
**Livor** 2, 220.  
**Luca** 1, 396, 442, 440.  
**Lucenses** 1, 424.  
**Lucifer** 2, 409.  
**Marcus** euangelista 3, 189.  
**Mars** 1, 57, 138, 402. 3, 290, 354, 355.  
**Martinus** V., pontifex max. 1, 339, 369.  
**Masus**, Albitius 1, 252.  
**Medices**, Cosmus D, 5, 6. 1, 8, 9, 10, 17, 37, 63, 72, 120, 310, 332, 335, 398,

- 421, 453, 475, 480, 485. 2, 1, 3, 4, 26, 46, 47, 49, 60, 78, 91, 93, 102, 130, 133, 143, 145, 160, 164, 171, 181, 208, 222, 246, 253, 261, 297, 300, 306, 379, 386, 392, 398, 411, 416, 417, 433, 449, 459, 464, 468, 472, 478, 490, 491, 497, 506, 508, 3, 1, 49, 67, 73, 78, 86, 96, 98, 108, 114, 115, 121, 126, 133, 148, 154, 173, 177, 186, 249, 263, 305, 346, 347, 360, 388, 400, 447, — Iohannes 1, 61. —, Laurens D, 1, 3, 428. —, Petrus 2, 312, 352, 3, 406. **Medices** (*plur.*) 1, 123, 2, 204, 3, 465. — parentes 1, 380.
- Medicus** amor 3, 151. — fons 3, 55.
- Medica** domus 1, 319. 2, 91. — gens 2, 528. — strips, 1, 61. **Medici** rivi 3, 62. **Medicae** aedes 2, 375, 474, 3, 125. — laudes 1, 38. — vires 2, 421.
- Mediolanum** 1, 225.
- Mercurius**, v. Cyllenius.
- Mugellani** fines et agri 3, 155.
- Musae** 3, 220.
- Mutinenses** agri 2, 455.
- Olympus** 1, 39. 2, 156, 334. 3, 94, 423.
- Orcus** 1, 130.
- Padus** 1, 187, 229, 358, 3, 296, 299.
- Parcae** 1, 203.
- Patavinus** populus 2, 465. **Patavinae** sedes 2, 272.
- Patavium** 2, 258.
- Philippus** dux Insubrium (v. Bebriacus, — dux, — tyrannus) 1, 337, 406, 447. v, 223, 226, 233.
- Phoebea** lampas 1, 3.
- Phoebus** (v. Apollo) 1, 421.
- Phthone** 2, 83, 84, 108, 112.
- Piccininus**, Nicolaus 1, 425. 3, 207.
- Pietas** 2, 144, 186.
- Pisa** 1, 232, 284, 300. **Pisae** 1, 236, 257, 262, 265.
- Pisanum** bellum 1, 238.
- Pistorium** 2, 411.
- Placentia** 1, 189.
- Plombinum** 3, 214.
- Religio** 2, 144, 187. 3, 45, 94, 123.
- Renatus** rex 3, 378, 380.
- Sapientia** 2, 43, 71, 73.
- Sforza**, Franciscus (v. Sforziades) 1, 441, 464. 3, 209, 234, 239, 247, 254, 344.
- Sforziades** (v. Sforza, Franciscus) 3, 267, 276, 326, 333, 337, 361, 384.
- Sisyphum** pondus 1, 206.
- Tartara** 1, 128. 2, 56, 76.
- Tartareae** umbrae 2, 80.
- Tervisium** 1, 445.
- Thuscus** leo 1, 170. — senatus 3, 383.
- Thusci** 1, 129. — saltus 3, 371. **Thuscae** turmae 1, 146, 181. **Thusca** agmina 1, 148.
- Tyrrhenus** leo 1, 243, 269, 284. 3, 339.
- Tyrrhena** gens 3, 70. — urbs 2, 18, 25, 218, 346. 3, 93, 159.
- Tyrrhenum** solum D, 6. **Tyrrhenae** orae 2, 173.
- Venetus** 1, 385. — senatus 1, 459. **Veneta** urbs 2, 506. 3, 74. **Venetum** nomen 3, 368. **Veneti** 1, 30, 364, 383, 388, 409, 438, 454, 477, 490, 492, 495, 498. 3, 225, 237, 240, 245, 251, 254, 270, 278, 287, 291, 297, 316, 324, 334, 344, 350, 356, 365, 381, 383. — fines 3, 357. — patres 2, 505. **Venetae** acies 3, 376. — aedes 2, 523. — leges 3, 299. — partes 3, 285. — sedes 3, 1. orae 2, 481. 3, 147, 359. **Veneta** castra 3, 232.
- Venus** 1, 48.
- Vestalis** virgo 3, 123.

## CORRIGENDUM

Pag. 16. v. 240. pro *Concio* lege *Contio*

# BIBLIOTHECA SCRIPTORUM MEDII RECENTISQUE AEVORUM

## SAECULA XII—XIII.

RM

**P. magister**, quondam Bele regis Hungarie notarius, *Gesta Hungarorum*, ed. *Juhász*. 1932. — — — — — 5.40

## SAECULUM XIII.

**Garlandia**, Iohannes de, *Integumenta fabularum Ovidii*, ed. *Born*. (Excuduntur.)  
**De orthographia** (incerti auctoris), ed. *Born*. (Apparebit.)

## SAECULA XIII—XIV.

**Dantes Alagherius**, *Epistolae*, edd. *Nachod—Stern*. (Apparebunt.)

## SAECULA XIV—XV.

**Ravenna**, Iohannes de, *Epistolae*, ed. *Smith*. (Apparebunt.)  
**Salutatus**, Coluccius, *De saeculo et religione*, ed. *Ullman*. (Apparebit.)  
**Trevisanus Maior**, Zacharias, *Orationes et testamentum*, edd. *Bertalot—Gothein*. (Apparebunt.)

## SAECULUM XV.

**Barbarus**, Franciscus, *Epistolae*, ed. *Gothein*. (Apparebunt.)  
— *Orationes. Una cum orationibus ad eundem habitis*, ed. *Gothein*. (Apparebunt.)  
**Barius**, Nicolaus — **Kostolan**, Georgius Polycarpus de — **Hungarus**, Simon — **Zagabriensis**, Georgius Augustinus, *Reliquiae*, ed. *Juhász*. 1932. — — — — — 1.50  
**Brandolinus**, Aurelius, *De comparatione rei publicae et regni ad Laurentium Medicen*, ed. *P. Angyal*. (Apparebit.)  
— *Dialogus de humanae vitae condicione et toleranda corporis aegritudine*, ed. *Iványi*. (Apparebit.)  
**Callimachus Experiens**, Attila. *Accedunt opuscula Quintii Aemiliani Cimbriaci ad Attilam pertinentia*, ed. *Kardos*. 1932. — — 1.70  
**Corsinus**, Amerigus, *Compendium in vitam Cosmi Medicis ad Laurentium Medicem*, ed. *Juhász*. 1934. — — 2.—  
**Cortesius**, Alexander, *De laudibus bellicis Matthiae Corvini Hungariae regis*, ed. *Fögel*. 1934. — — 2.—  
**Facius**, Bartholomaeus, *Invectivae in Laurentium Vallam*, ed. *Valentini*. (Apparebunt.)  
**Ficinus**, Marsilius, *Epistolae*, ed. *Kristeller*. (Apparebunt.)  
**Hungarus**, Simon, v. **Barius**, Nicolaus.  
**Kostolan**, Georgius Polycarpus de, v. **Barius**, Nicolaus.  
**Martius Narniensis**, Galeottus, *Carmina*, ed. *Juhász*. 1932. — — 1.80  
— *De egregie, sapienter, iocose dictis ac factis regis Mathiae ad ducem Iohannem eius filium liber*, ed. *Juhász*. (Excuditur.)  
— *De incognitis vulgo*, edd. *Juhász—Kardos*. (Apparebit.)  
— *Epistolae*, ed. *Juhász*. 1930. — — — — — 1.—  
— *Invectivae in Franciscum Philelphum*, ed. *Juhász*. 1932. — — 2.50  
**Pannonius**, Ianus, *Opera*, ed. *Husztí*. (Apparebunt.)



- Philelfus**, Franciscus, Sphortias, edd. *Fögel—Juhász*. (Apparebit.)  
**Ransanus**, Petrus, Epitoma rerum Hungararum, ed. *Juhász*. (Excuditur.)  
**Savonensis**, Guilhelmus, Dialogus, an mortui sint lugendi an non, ed. *Maschek*. (Apparebit.)  
**Seneca**, Thomas, Historia Bononiensis. Qualiter Galeatius Mare-scottus eques extraxit Hannibalem Bentevolum de carceribus et reliqua per utrunque gesta. Carmen epicum, ed. *Fögel*. 1932. 3.60  
**Strozza**, Titus Vespasianus, v. Saecula XV—XVI.  
**Valagussa**, Georgius, Epistolae, ed. *Juhász*. (Apparebunt.)  
**Vitez de Zredna**, Iohannes, Epistolae — Orationes, ed. *Juhász*. (Apparebunt.)  
**Zagabriensis**, Georgius Augustinus, v. Barius, Nicolaus.  
**Zovenzonius**, Raphael, Carmina, edd. *Fögel—Juhász*. (Apparebunt.)

## SAECULA XV—XVI.

- Andronicus** Tragurinus, Matthaeus, Epithalamium in nuptias Vladislai Pannoniarum ac Boemiae regis et Annae Candaliae reginae, ed. *Juhász*. 1933. — — — — — 1.—  
**Balbus**, Hieronymus, Epigrammata, ed. *Iványi*. (Apparebunt.)  
**Celtis** Protucius, Conradus, Ludus Dianae — Rhapsodia, ed. *Rupprich*. (Apparebunt.)  
 — Oratio in gymnasio in Ingelstadio publice recitata. Cum carminibus ad orationem pertinentibus, ed. *Rupprich*. 1932. 1.30  
 — Quattuor libri Amorum secundum quattuor latera Germaniae — Descriptio Germaniae generalis. Accedunt carmina aliorum ad libros Amorum pertinentia, ed. *Pindter*. (Excuduntur.)  
**Fontius**, Bartholomaeus, Carmina, edd. *Fögel—Juhász*. 1932. — 2.—  
 — Epistolarum libri III., ed. *Juhász*. 1931. — — — — — 4.50  
**Naldius** (de Naldis) Florentinus, Naldus, De laudibus Bibliothecae libri IV. ad Mathiam Corvinum Pannoniae regem, edd. *Juhász—Mocarski*. (Apparebunt.)  
 — Elegiarum libri III. ad Laurentium Medicen, ed. *Juhász*. (Excuduntur.)  
**Piso**, Iacobus, Opera, ed. *Juhász*. (Apparebunt.)  
**Strozza**, Titus Vespasianus, Borsias (Fragmenta) — Bucolicon liber, edd. *Fögel—Juhász*. 1933. — — — — — 1.40  
**Verinus**, Ugolinus, Carlias, edd. *Fögel—Juhász*. (Apparebit.)  
 — Epigrammatum libri VII. edd. *Fögel—Juhász*. (Apparebunt.)  
 — Panegyricon ad Ferdinandum regem et Isabellam reginam Hispaniarum de Saracena Baetidos gloriosa expugnatione, edd. *Fögel—Juhász*. 1933. — — — — — 2.20  
**Warda**, Petrus de, Epistolae, ed. *Iványi*. (Apparebunt.)

## SAECULUM XVI.

- Duditius**, Andreas, Epistolae, edd. *Costil—Juhász*. (Apparebunt.)  
 — Opera varia, edd. *Costil—Juhász*. (Apparebunt.)  
**Merenda**, Livius, Hercules — Seilas (Fragmenta). Ludi scenici, ed. *Tescari*. (Apparebunt.)  
**Olahus**, Nicolaus, Carmina, edd. *Fögel—Juhász*. (Excuduntur.)  
**Sambucus**, Iohannes, Epistolae, ed. *Gerstinger*. (Apparebunt.)  
**Stretzinger**, Thomas, Oratio ad d. Leopoldum in gymnasio Viennensi habita, ed. *Maschek*. (Apparebit.)

## SAECULA XVI—XVII.

- Istvánffy**, Nicolaus, Carmina, ed. *Holub*. (Apparebunt.)